

四庫全書

史部

欽定四庫全書

姑蘇志卷五十一

明 王鏊 撰

人物九 名臣

王棠字子思紹興五年以進士左朝奉郎知江陰軍請
立學官教授員給田以養士遂詔范雎充教授棠又
刻春秋三傳于學雎亦篤意訓率風俗為變又請於
尚書截留秋苗以為軍儲其畧謂江陰自昔為屯戍
之地而庫無儲金廩無餘粟全藉內郡撥發錢穀以

實邊壘今本軍稅賦僅充歲額之上供而利源不足
以給按月之發納一錢一粒皆赴漕司其後民力益
困則羣譟而越訴前後官吏以允偕敷率得罪囚繫
者相踵然棠設以罪逐何足筭哉誠恐上誤國家邊
備雖死無益愚意欲留本軍秋苗一二萬石每歲椿
留準備緊急支用候至次年新苗入倉却將陳米起
發其於漕司歲計並無虧損直有遲速之少異所貴
常有儲積以備不虞耳其他善政率多類此

陳字字伯愛侍讀襄諸孫也自宜興徙常熟以父澤為
莆田尉得劇賊格當霑賞字愀然曰吾其可藉人命
為自進之階卒辭之調紹興府司法隆興中改知富
陽縣分差鎮江府糧料院知潮州提轄行在權貨務
知房州歸卒年六十一字孝友廉潔居母喪鬚髮盡
白撫愛諸弟俸祿不入私室家無金銀之器常自謂
先世以清白遺子孫豈惟富不可求亦所不願也

趙思字再可其先洛人從父孝孫字仲修建炎避地來

常熟思生甫三歲及長通春秋登第調鍾離簿以邊
賞循從政郎改通直郎乾道中虞允文薦之孝宗引
見便殿首問恢復大計奏對稱旨除大府寺簿大常
丞兼度支郎官台州闕守上問大臣誰可任者僉以
思對亟出御筆以授不數月翕然稱治上親書姓名
於御屏除直秘閣淮南路轉運判官兼提點刑獄過
闕辭上曰天台之政朕鉅細悉聞知卿忠實可仗就
陞副使除戶部郎官總領淮東軍馬錢糧未幾奏計

遷起居舍人充金國賀生辰使先是國信所錄大旨
遇御名處皆闕不書蓋嘗有稱之者思曰臣子安得
名君父及致詞于廷敵使從旁咕囁亟令道名思弗
之顧敵以為慢斥之朝廷以金國有詞遂罷歸奉祠
八載有使北者言人間問趙運使安否不絕起為廣
西提刑上曰朕每愛卿才不令遠出改知湖州除直
龍圖閣再任尋除起居郎權吏部侍郎奉祠再知靜
江府廣西經畧以職事修舉除祕閣修撰後以集英

殷修撰再奉興國祠累轉中大夫卒年七十

顏度字魯子充公五十三世孫自唐魯公真卿兄子顥
為常熟令其後遂為吳人度居崑山以文章政事名
一時歷海門簿臨海令有去思乾道五年知長興縣
遇事慈恕以善惡福應之說諭人人不忍欺其聽訟
於淳樸中時出智計以得其實聞者稱為神明一日
某王自寧國入朝舟次縣界皆以婦人挽韉王怪問
之皆云知縣顏佛子愛惜民力縱男子耕種卒難召

集恐累顏公故婦女悉當其役洎入對孝宗問卿治
郡得人乎即以度對未幾召拜監察御史遷軍器監
司農宗正太常少卿權工部侍郎直寶文閣江東福
建運副知湖州江東京西運副以中大夫祕閣修撰
提舉冲佑觀封長洲縣男卒年七十五度與朱熹友
善孝宗謂度每出一言不動如山因以如山自號焉
范成大字致能吳縣人父雱字伯達入太學聲譽翕然
擢第入館除祕書郎成大在懷抱中已識屏間字年

十二徧讀經史十四能文詞父亡讀書崑山薦嚴寺
十年不出取唐人只在此山中語自號此山居士又
慕元魯山為人字已幼元先友王葆勉之曰子之先
君期爾祿仕志不可違也課以舉業登紹興進士第
授戶曹監和劑局隆興初纂類高宗朝政除樞密院
編修官遷正字乾道初升校書郎編修國史歷著作
郎轉吏部郎官言者論其超躐罷奉祠起知處州陞
對論力之所及者三曰日力曰國力曰天力今盡以

虛文耗之上嘉納至州勸義役隨戶富貧輸金置田
助當役者甲乙輪第其後入奏言之詔頒其法於諸
路作通濟堰蒐訪故迹疊石築防置隄閘立水則溉
灌有序民食其利刻重修堰規于石除禮部員外郎
兼崇政殿說書以文學材氣為上所知乾道令以絹
計贓估價輕而論罪重成大秦承平時絹疋不及千
錢而估價過倍紹興初年遞增五分為錢三千足今
絹實貴當倍時直上驚曰是陷民深文遂增為四千

而刑輕矣隆興再講和失定受書之禮右相虞允文
建議遣使遷成大起居郎假資政大學士侍讀國公
充金祈請國信使國書專求陵寢乃汎使也上臨遣
之曰卿氣宇不羣朕親加選擇聞外議洵洵官屬皆
憚行成大對曰無故遣汎使近於求釁不執則戮臣
已立後仍區處家事為不還計心甚安之上愀然曰
朕不敗盟發兵何至害卿齧雪餐糲或有之不欲明
言恐負卿耳成大乞併載受書事不從金迓使者慕

成大名至求巾幘效之成大知其法嚴附請決不可
達一不泄語二使不復疑至燕山夜蔽帷秉燭密草
奏具言他日北使至欲令親王受書其辭云云懷之
以入初進國書辭氣慷慨金君臣方傾聽成大忽奏
曰兩朝既為叔姪而受書禮未稱昨嘗附完顏仲李
若川口陳久未得報臣有奏措笏出之金主大駭顧
諱宣徽副使韓綱曰有請當語館伴此豈獻書處邪
厲聲令綽起者再三成大不為動再啓曰奏不達歸

必死寧死於此鋼復以笏導成大拜成大跪之如初
曰若奏達當下殿百拜以謝時金廷紛然太子欲殺
成大其兄越王止之既還館所金主遣伴使宣旨取
奏鋼押宴謂成大曰公早來殿上甚心勤主上嘉歎
可以激勸兩朝臣子廷議方殷會夏國有任德敬者
乃夏酋外祖號任令再世用事謀篡事敗而族蜀宣
撫司故嘗以蠟書通問為夏人所獲致之金主益怒
成大朝辭遂令傳諭詰之成大答以姦細之偽不可

測退朝而館伴持真書來印文皦然可識成大笑曰
御寶可偽况印文乎金人直其詞遂不竟十月使還
金國報書有抑聞附請之辭欲變受書之禮出於不
意要以必從之語上由是知其忠勁有大用意除中
書舍人初上書崔寔政論賜輔臣成大奏曰御書政
論意在飭綱紀振積敝而近日大理議刑遞加一等
此非以嚴治平乃酷也上稱為知言成大立朝多奇
節上用知閣門事樞密都承旨張說為簽書成大留

詞頭七日不下忽請對良久乃出制草納榻前上色
遽厲成大徐奏曰臣願引諭以聞今朝廷尊嚴雖不
可下擬州郡然分之有別大小畧同閣門官日日引
班乃今郡典謁吏耳執政大臣倖貳比也陛下作福
之柄固無容議但聖意以謂有一州郡一旦驟拔客
將吏為通判職曹官顧謂何邪官屬總俛首吏民觀
聽又謂何邪上霽威久之說命竟寢後月餘成大丐
去上曰卿言引班事甚當朕方聽言納諫卿乃爾邪

尋以集賢殿修撰知靜江府奏鈔鹽科抑之敝格互
市馬法除敷文閣待制四川制置使知成都教閱將
兵修置堡砦上賜度牒四十萬緡蜀中名士孫松壽
樊漢廣皆挂冠不仕成大表其節徵之不起由是遠
近歸心進敷文閣學士入對除權吏部尚書淳熙五
年遷中大夫參知政事兩月為言者所論以資政殿
學士知婺州奉祠而歸起知明州兼沿海制置使奏
罷海物之獻除端明殿學士尋擢江東安撫使兼行

官留守知建康府歲旱奏移軍儲米二十萬以賑饑
民減租米五萬捕斬水賊徐伍以病請閒十六年進
資政殿學士起知福州封吳郡開國侯再領洞霄宮
紹熙三年加大學士知太平州尋納祿以歸封吳國
公明年卒官至通議大夫贈銀青少師追封崇國公
謚文穆成大天資俊朗輔以博學為文瞻麗清逸自
成一家尤工於詩四方傳誦上嘗命陳俊卿擇文士
掌內制俊卿以成大及張震對成大所歷名藩興利

除害不顧難易去思遺愛所在歌舞之嘗自號石湖居士有石湖集一百三十六卷使北有擘轡錄在廣有虞衡志出蜀有吳船錄家居時與郡士龔頤周南滕宓采緝郡事為吳郡志五十卷弟成績建康府通判從兄成象字至先紹興進士嘗提舉湖南常平訪衡州石鼓山諸葛武侯廢祠修之張宣公栻為記其事歷福建轉運判官工部郎中浙東福建兩路提刑成大事之如嚴師成象子藻

樂備字順之一字功成由淮海徙崑山有學行名能文章尤長於詩與范成大馬先覺結詩社由進士官至軍器監簿

趙磻老字渭師東平人居吳江黎里孝宗朝以書狀官隨范成大奉使金國成大薦之擢正言乾道八年以右通直郎知楚州入為太府寺丞復由兩浙轉運副使知臨安府除秘閣修撰權工部侍郎

湯琦字君寶本瀏陽人淳熙中第進士與王容易被號

長沙三俊調德安府教授除太學錄光宗內禪議修
泰安宮太上重於造御璽貽書趙汝愚引唐武德九
年八月甲子太宗即位于東宮顯德殿至貞觀二年
四月乙亥太上皇徙居泰安宮甲午太宗始御太極
殿則是太宗聽政于東宮者三年不遽遷高祖也今
日或可仿比別營聽政之所上皇仍居大內事體甚
順汝愚答書稱其援據精博深合事宜越九日有旨
秋暑方隆太上皇帝皇后宜用唐武德貞觀故事未

須遷宮因名宮以壽康而泰安之役遂寢尋升博士
慶元初通判贛州常平以歲饑發粟賑糶璫適慮囚
至寧都民以不能均糶赴愬而所糶皆胥吏有產之
家遂除去二等減口三千盡發餘廩移文巡尉勸分
全活饑民以萬數又改吉州嘉泰初遷國子博士時
召朱熹為侍講尋自祠去璫疏熹以正學為講官啟
沃之益曾未踰時輒聽其去必駭物論宜追召熹仍
授講職不報由是忤權臣意而直聲大著歷樞密國

子兩院編修除書丞兼權禮部郎官例掌三省奏記
四年京城火應詔直言謂左氏說天火曰災人火曰
火後世遂謂出於天者乃譴告之昭彰不可不畏出
於人者由防微之不謹可以無懼不知春秋書法雖
因天人以變文而天明畏自我民明威其為譴告則
一也五行者之說曰信道不篤惑燿虛偽讒夫昌邪
勝正則火失其性自上而降或濫炎妄起雖興師旅
不能救也夫自上而降者天火濫炎妄起者人火二

者雖異其失均本於人其變均之為火失其性也因
推原今日天變之由生而歸之於郡守監司之貪黷
執政臺諫之非其人時韓侂胄陳自强皆銜其言及
草宰執率百寮請皇帝御正殿三表引善則稱君過
則歸已之義出知台州開禧初連書詆侂胄用兵任
人之失侂胄益怒兩易知常州修器械積糧料葺城
砦謹江防究水利恤流散三年降三官謫居贛州嘉
定中丁父憂特旨自便四年叙復元官寓居平江主

管台州崇道觀亳州明道宮起知信州又除駕部郎
官未赴除太府大理二少卿未兩月以疾請郡待次
贛州封瀏陽縣開國男寶慶初以中大夫直徽猷閣
致仕卒年六十九塤負直槩與韓侂冑陳自强不合
屢嗾言者中傷故奉祠閒居之日多於數歷屬辭務
持大體不為阿曲所著春秋要論詩文奏議凡百卷
又有建炎德安守禦錄子誼伯湖州戶曹曾孫暉老
咸淳進士暉老子彌昌

彌昌字師言父子授受皆以周禮發鄉解及元舉教官
由長洲崑山儒學教諭鄱江清獻兩書院山長建康
路學教授轉從政郎瑞安州判官致仕平生篤志義
理之學以文名于時有周禮解義碧山類藁湘江櫂
歌若干卷

林樸字伯振長洲人乾道中為長興簿知武昌縣嘗云
交代有子孫之契不闕惡金穀僅有虧欠當即與

交頭無令滯其批書時人稱其長厚弟琰字玉圭善

篆書同舉進士

趙公豫字仲謙自父少卿家常熟公豫幼聰警記左氏傳不謬一字登進士第調無為縣尉無為軍錄參福建運司主管帳司改差行在激賞北酒庫知仁和縣兩易餘姚縣分差鎮江糧料院知高郵軍真常二州提舉浙東常平茶鹽除倉部郎官兼刪修勅令官遷大理少卿差充接送伴金國賀正旦使遷太府卿除祕閣修撰知太平州江東轉運副使進集英殿修撰

宮觀開禧初陞寶謨閣待制致仕嘉定五年卒年七十八公豫沈厚清苦平居以清坐為適無豪髮干請州縣居官廉正常言吾求為循吏不求為健吏有奏藁一卷燕堂類藁五卷弟公升公願仕皆至麾節類有政績可紀

王伯廣字師德常熟梅里人少從中書舍人楊邦弼學由進士乙科調德清尉歸鄉里悉以家產予諸弟一毫不自取也嘗往臨安謁通判同縣張枬枬曰試教

官乎遂指授蹊徑未踰月以程文示之柟大驚曰天才也即魁教官選授温州平江教授改常州未上卒伯廣文章出於天性尤工於詩四六亦為人膾炙與張孝祥友善所著聽雨集藏于家

冷世光字賓王常熟人與弟世修世南同入太學時稱為三冷與世修同登紹興進士第調歸安簿知歷陽寧國二縣廣德軍教授改秩知龍遊縣朱熹為常平使者旁邑令見訴于民熹命世光體實世光辭熹强

之世光乃往遂得其情兩省交薦幹辦行在諸軍審計司除監察御史遷殿中侍御史條奏忠切彈劾無所避周必大獨相初除吏世光即論之施聖與以元樞出知泉州亦遭劾罷人謂之冷面御史既而去國奉祠尋知嚴州句祠得請既又引年以歸里居泊如年八十卒世光事親孝居喪哀與諸弟和於子孫盡其教自父通奉力賑施邑里世光兄弟率行之不替鄉人至今高仰之有奏議彈章若干卷東堂類稿二十卷

世修字良器調崇德縣簿知州張瑜異之移攝理掾獄
屢空隆興初知興化縣辟監行在北外門激賞庫改
秩乞回一階封垂白之母上特命詞以寵之遠近歆
豔知上元縣民有互訟者諭之曰骨肉爭鬪非美事
也今以律繩汝終身不可復聚矣民感泣願息爭通
判和州守尚峻嚴世修濟以寬秩滿吏民詣臺乞留
得知南康軍未上即丐祠卒年七十三終朝奉大夫
有雜文三十卷詞科類要十卷

崔敦詩字大雅世家靜海晚寓常熟紹興末由進士主
高郵簿兩浙運幹除祕書省正字繼兼翰林權直早
有文名制詞溫潤詳雅兼崇政殿說書權給事中遭
內外艱時學士周必大乞補外壽皇中批問吏部尚
書韓元吉曰崔某今安在元吉具言之召見除樞密
院編修官復為權直既拜命即言翰林權直為名未
正乃更為學士院權直遷著作郎兼權吏部郎官又
兼崇正殿說書進國子司業改權直學士院拜中書

舍人加侍講直學士院敦詩賦性端厚議論疏通知
大體自直宿遞講遇引對所陳必剴切至造膝密啟
有家人不得覘其藁者上深所器許九年以疾卒年
四十四贈中大夫有文集三十卷內外制藁二十三
卷奏議總要五卷通鑑要覽六十卷制海十編監韻
五編

胡元質字長文長洲人父珣治生大穰所親為之宰負
金萬數珣焚其書待之如常元質少穎悟尚行義中

進士初寓臨安聞鄰有貧士夜哭乃為人責償鬻其女與別元質慨然垂橐予之光宗即政用薦入為太學正歷祕書省正字校書郎終給事中嘗極論人主言動不可不謹至累百言帝書之座右恩眷特厚為書王褒聖主得賢臣頌及親製大才論以賜出守和州太平建康皆有政績淳熙中四川制置使知成都奏減蜀鹽虛額錢大畧謂蜀鹽虛額者惟茶鹽酒三事為最鹽之為害尤甚於酒鹽井重額沈痼百姓垂

五六十年蓋蜀鹽取之於井山谷之民相地穿鑿深至六七十丈幸而得泉以石甃砌大者方五六尺以木革為囊數十人引大繩汲取之自子至午泉派漸竭乃繼人入井以手掬取投之於井引繩而上此數十人晝夜號呼推車挽繩不息然後得水入竈燒煎成鹽比東南煮海人力所及與陝西解池工力百倍又有小井謂之卓筒大不過數寸深亦數十丈以竹筒設機抽泉窮日之力所得無幾鹽戶窮困可以槩

見解池則不須煎煮止於池旁各分畦瀧導水而入
一夕得風並皆凝結鹹水之在江海既無限量又省
工役故其鹽沛然有利無害四川產鹽地分除太寧
監依山厓間鹹泉流出若小路澗稍易分給燒煎其
他州縣皆係鹽井汲泉煎煮大段費力簡州鹽額最
重虛額尤多由是每歲計豁除折估錢五萬四千九
百餘貫又請蠲夔路九州民間歲置金銀重獎蜀人
德之關外西河階成鳳四州所聚民兵謂之忠勇皆

以土兵為之先是虞允文團結二千九十四人其後不能增募元質奏令四州守臣添招仍立賞格詔每州各先募五百人及奏唐之季年吐蕃寇至必入黎文南詔寇至必入沈黎吐蕃南詔合入寇必出灌口其文黎兩州去成都尚千里關隘險阻足以阻隔唯灌口一路去成都止百里又皆平陸朝發夕至大率沿邊諸州城資堡砦以為蔽堡砦賴州城以為援惟威茂兩州其堡砦叅錯於中州城孤立於外而屬部

蕃落周分環據二三百里之間官路僅留一線達于
兩州若邊事不寧孤城坐見隔絕所奏利害似者尚
多元質吳中舊居即程公闢南園故址既歸杜門自
適奉祠逾六七年以正奉大夫敷文閣學士吳郡侯
致仕卒年六十三贈金紫光祿大夫少師謚獻惠平
居未嘗疾言厲色及評人短長或告以人之傾已輒
俛首欲寐每自謂於人無怨惡其心休休然好善樂
施家資多推予諸弟不較子綰綰絳弟元功

黃由字子由長洲人父雲字景祥嘗為淮西總所酒官
由弱冠有聲太學淳熙八年廷對時甘昇為入內押
班見知用事二十年招權市賄與曾覲王抃相盤結
由對策及之遂舉進士第一吳自有科目以來由始
冠多士時人榮之授南安軍簽判秩滿通判紹興府
往新嵎督行荒政由改糶為賑擅發米五萬石予民
不取其直除正字遷著作佐郎使金還遷將作監嘉
王府贊讀紹熙五年孝宗疾亟光宗不能視疾人情

益懼由請嘉王過重華宮問安孝宗為之感動寧宗
即位累除權禮部尚書兼吏部將大用之會知綿州
王沆朝辭乞詔廟堂銓選若嘗受偽學薦舉陞改及
衆論指為偽黨者籍記姓名且與勿用由入奏謂人
主不可待天下以黨與不必置籍以示不廣繼擢沆
利州路轉運判官由亦出知成都張巖奏由阿附權
臣植立黨與遂以雜學士奉祠嘉定初以正議大夫
知紹興府浙東安撫使聞嵎縣昔有虎患訛言謂虎

歲久有神變化叵測或為僧形或為猿狙倏忽莫可蹤跡由禱於神厚賞募人捕之殄滅無遺種民賴以安三年除刑部尚書兼直學士院官至正奉大夫自號盤野居士卒贈少師

衛涇字清叔其先齊人唐末避亂南遷多居華亭祖闕始占籍崑山之石浦父李敏通判鎮江府涇少有異操入行在從永嘉李去智學李卒為制服執喪人咸義之淳熙十一年孝宗擢涇進士第一比唱名御筆

殿試上三名欲觀其政事可特與添差差遣仍釐務授涇承事郎添差鎮東軍簽判涇以對策嘗陳添差之弊三上表乞待次上以涇力踐所言知重始進特從其請故事狀元初任垂滿必通謝于宰執始頒召命時王淮秉政涇不通謝雖被召三月不得引見十四年除祕書省正字輪對言陛下即位之初銳意事功不次用將相痛憤以圖恢復二十六年之久無一事足以少稱陛下意者而陛下大有為之志亦少弛

矣一祖八宗之業太上皇付託之重子孫億萬年之
基緒陛下一身任之豈可僅取苟安無事而遂已耶
庸常之才持祿保身而風俗日壞士氣日卑民生日
困臣恐天下之患將有出於意慮之外者事幾易失
時不再來願陛下堅自強之志振紀綱以張國勢作
氣節以厲媮墮則靜可以強根本動可以復土疆而
事功立矣光宗初立政尚修謹涇以著作佐郎賜對
言今日風俗頹靡百度縱弛人材削弱國勢未張汲

汲有為尚恐不濟若猶因循其敝將至於不可為矣
又言中國之與北敵其勢決不能兩立名為和好實
則仇敵名為息兵實則觀釁復讎之志直須時耳今
以偏方之勢與敵持久自紹興來五十年無大戰自
隆興來三十年無小鬪敵帥新立血氣方剛間隙之
生遠不過五六年耳願陛下奮發英斷規恢遠圖卧
薪嘗膽不忘北鄉聖志先定然後與二三重臣講求
大計委任而責成之內治外備則大讎可復中興可

期矣又言自陛下踐祚臺諫給舍多不得其職今日
士氣向衰風采銷落陛下所當長養振作而反陰銷
潛沮之將使羣臣上懼陛下之威命下虞羣小之中
傷苟且成風諂諛充位脫有大姦巨惡誰為陛下言
者紹熙元年遷著作郎兼司封郎官二年正月震雷
雨電大雪繼作涇應詔上封事言雷陽也雪陰也陽
氣方升而陰制之此雪所以降也以象類而求則君
欺於臣夫陵於妻外藩謀王畿小人害君子皆陰勝

陽之證也有一於此皆能致亂陛下不可不預防也
時倭倖漸肆李后悍妬故涇以為言出為淮東浙東
二路提舉慶元初召為尚右郎官上殿論壽皇孝養
禮曠以為太上之於陛下親父子也天性之愛血氣
之屬慈孝之心宜無毫髮疑間雖太上疾勢未平語
言舉動若未容於進見者然陛下孝心純篤豈以吾
親之不可見而遂已乎臣聞叅天地贊化育曰誠而
已金石之無情鬼神之至幽猶以誠而能動矧人子

之事親誠極其至焉有不能感動者乎願陛下兢業
於中以親之未順為憂以期於見親為念積此誠意
庶幾太上之懽心可得而喜付託之得人矣三年以
起居舍人假工部尚書使金國還言彼有危亡之兆
而吾無自治之策使吾治具畢張備禦無闕敵雖強
不足畏倘偷安歲月僅了目前一弱國滅一強敵生
猶未足以為喜也初涇之往寧宗諭使覘國而金為
蒙古所攻我有乘釁之意涇深懼其輕動故還奏如

此除直煥章閣知慶元府沿海制置使以言者論罷
是時權姦用事涇不為勢怵斥去十年不調於里中
闢西園取范文正公之言名其堂曰後樂開禧元年
得旨入朝明年除中書舍人兼直學士院應詔論北
伐非計不聽三年自吏部尚書拜御史中丞請誅韓
侂冑論罷陳自强拜參知政事封崑山縣開國伯嘉
定初兼太子賓客始侂冑之誅涇功居多既又患史
彌遠有專恣之漸因欲去之彌遠為景獻舊學知涇

謀諷御史劾罷之五年知潭州八年知隆興府上以
涇三世同居有堂曰友順御書二大字太子亦為書
後樂堂勝賜之九年知揚州十七年除資政殿學士
金紫光祿大夫致仕進封吳郡開國公寶慶二年卒
理宗輟視朝一日特贈太師追封秦國公賜諡文節
涇仕三朝出入內外四十餘年憂國忘家始終一節
謀深慮遠不徼近功其進退之際與時升降嘗語人
曰官職自有定分名誼千古不磨故其在朝孤立自

守不畏強禦以賢才為立國之基薦進搜舉汲汲如不及如李燔輔廣倪思陳韓皆其人也任潭時與朱熹有交承之好侂冑斥熹侂冑死涇奏召熹還朝而熹已卒復移文新安取熹諸經四書傳註刊刻以傳又請為張栻賜諡表章正學之力為多別號後樂居士所著文章五十卷曰後樂集涇弟湜字正叔好古博學除太府寺丞將作少監皆不赴嘗集禮記諸家傳註為一百六十卷名曰禮記集說寶慶二年上之

終朝散大夫直寶謨閣知袁州學者稱為櫟齋先生
櫟師旦字周卿其先朐山人建炎間始來平江遂為郡
中大姓父錯字公範登政和進士第為確山縣市易
務由博士持使節與秦檜議不合棄官去以終贈金
紫光祿大夫師旦年十七登進士第歷高郵西安二
縣尉通州南康軍衢州三郡教授授宣教郎知富陽
縣歲旱澇民饑極力拯救易鹽官承究心荒政兩邑
多所全活淳熙十三年辟御史臺主簿轉朝奉大夫

除祕書郎紹熙三年擢刑曹郎官五年知秀州賑卹
荒災民不告病慶元初以尚書左司郎中召適金國
賀生辰使至以顯謨閣學士正議大夫提舉萬壽觀
兼侍讀咸安郡開國侯充接伴使卒年六十七累贈
正奉大夫子溧

溧字子長初以郊恩授如皋尉登慶元龍飛進士第改
和州司戶叅軍有嘯聚盜伐山林者溧詰責其尤而
貸其衆悍卒或出怨言從容撫諭列營帖然嘉定七

年知廣濟縣崇庠序督課試先是邑苦役法溧喻民
自得差次率無橫擾獄訟衰止為民請雨憂悴懃懇
蝗不為災講行荒政勸率富民得椿積三萬緡告糴
旁近米直頓平於鄉落多置子塲濟糴遠近均惠歲
不知歉郡守監司列狀于朝有旨中書籍記後一年
麥大稔兩岐叢生連接畦畛邑人圖繪稱頌將白于
州溧謝止之又請於秋苗外別置義倉出公帑糴米
儲之謂之官社有田于鄉者更勸出粟謂之民社各

廩於鄉每一鄉為兩倉擇鄉所推信者三人掌之謂之社長又聚穀於倉每春量丁口多寡許鄉借貸秋成每石取息二斗耗五升以折庸賃之費五年息及本則歸本於主又五年息又及本復以息之半酬之民社既豐則賑糶以還官社仍再糶以實穀廩焉其區畫事目凡十條編次成帙上之於州州鏤版下屬邑且為申請旌賞邑據往來之衝將受代邊遽旁午戍役經從資給需用尤夥溧訓習民兵招刺萬弩手

聲援響應凡所抑配民以凍至誠不忍紆緩泊去官
民又白於上官借留泣送至百里外又即學宮佛舍
為立生祠十五年通判吉州歲歉守將委湔推行蠲
租平糶之法民被其惠如廣濟時十六年通判臨安
府京尹舉自代十七年差監察御史首論汚玷臺列
輕儇妄庸之人中外稱快且言士大夫均受爵祿負
責任辭難就易遠怨市恩欲進則自誓赴蹈既得則
臨事依違迹似謹飭中實苟容甚至鼓惑是非撰造

飛語更相傳播動涉誣妄始焉傾心植黨幾同膠漆
終則叛交背毀殆甚仇讐食肉偷安尚忍傾覆設有
緩急其足仗乎時人稱其有仁者之勇又論年來受
納秋苗之弊誅求日甚有增無損詔下諸路轉運鏤
版禁約理宗即位除右正言奏畏天悅親講學仁民
四事又疏謂淳熙之厲精不在於信賞必罰激勸羣
工而在於深明究弊之原嘉定之更化不在於誅翦
權姦肅清邇圉而在於不偏羣用之材若學術求相

高則必至於激議論求相勝則必至於矯職守求相
陵則必至於爭願執中守正深體建極之道而二三
大臣益求治泰之宜又論邊備宜蓄威望以開重寄
示恩信以服義旅廣招刺以固邊障便收糴以省漕
運又論賞罰之弊及官屬泛濫請從省罷科目具文
請定限制三軍招刺請先擇子弟差役紛爭乞主義
役時臺臣請上謁原廟議自湫始也又上定規模正
紀綱振起人才肅清官列擇監司守令選將帥愛民

強兵八事詔舉賢能首以丹陽劉宰為薦嘗奏謹微
謹獨勸上持守勿失深在臺諫所劾者十一人每疏
成焚香禱云某人得罪清議非深已私彈章傳播悉
當其罰或有與深意趣不同者恐修睚眦之怨深曰
此豈報復私隙地哉寶慶初除宗正少卿明年改太
常少卿上疏論思睿作聖之功甚切又奏請修寧宗
玉牒尋乞外任除直顯謨閣浙東提刑俾郡縣各置
代厯以絕欺蔽効治屬吏之故縱失入留獄任情者

風裁凜然三年詔兼本路常平侍御史知孝奏對論
及監司因言近所遣虞凜葉宰皆好監司上稱善以
疾轉朝議大夫祕閣修撰致仕年五十六贈銀青光
祿大夫溧學問充實性稟純厚退靜清介居家孝友
雍睦臨政勤敏而能急吏緩民誅鉏豪右立朝正色
剛直平易有循吏之風大臣之節其居諫職不肯順
旨劾真德秀由是去國名重當世子聶

聶字伯升初以祖郊恩補將仕郎中銓試授迪功郎端

平初監無為軍襄安鎮實濡須要衝三年北兵益張
聲習射訓兵修器械易旗幟軍容士氣一新境內以
安知軍丁仁以三鄉民兵俾聿總統命旁邑取以為
法提舉羅愿特薦于朝嘉熙二年以兵射發策聿即
所閱歷敷陳知貢舉游侶異之擢進士第差行在豐
儲西倉斛面譏察官淳祐初北兵至通州時議以防
江為急聿上五事曰置砦屋以廣江防給閒田以復
流散選土豪以任團結嚴間探以闖敵情復山水砦

以限敵騎之衝六年知長興縣釐賦役平訟獄適歲
荒艱糴糴出告身抵義倉米千餘石以活餓人帥祁
嚴勘與鄰境鬪爭嘯聚數千人糴奮身撫諭皆得其
平尋改來安縣秩滿充淮西安撫機宜築浚揚州堡
城屢受陞賞轉朝散大夫差知廉州未行改安慶府
又改無為軍開慶初以趙葵薦除將作監丞沿江宣
撫司參議官差知處州改安慶府景定初疏法堯舜
十二事上獎納且戒以惠養遠民下車首遏貪暴扶

植善良重賞格以嚴教閱決滯訟正誣枉在官四年境有嘉穀之瑞父老生為立祠轉朝議大夫封吳縣開國男卒年七十七弟弇

弇字仲昭以父致仕恩調崇仁丞知山陰縣邑舊苦催科往往抑稅長代輸至郡議排甲以易之弇言在於擇令稅長有弊排甲豈獨無之復釐正稅長所收不趣而辦移丹徒縣先是縣令接送凡納堂日用百需悉出於吏吏並緣為姦名白納錢里正破產不能支

春夏之交輒預借苗以取曰子錢縣多山田率苦旱
每一體放度其價直反倍於納苗民以重困弁首嚴
納堂之禁催科則給引使經承設匭使自投繳民不
復用一錢又每都置人直縣給里正紫袋俾往來有
公事吏不得高下其手舊有折羅折麥二錢弁併為
一遇旱輒躬自檢實不以屬吏由是執役戶或終歲
不入縣門小民號為太平官府又以餘力新作廳事
諸司交薦以為八郡之最邑人立碑頌德由淮東安

撫機宜通判揚州改江東安撫司參議知建昌軍縣
給袋歷使申述民隱境內旱暵齋祓而雨除太府寺
丞改度支郎官舊本部五司印通用無所考柅弇白
長貳支帖止用度支印輪對首奏畏天愛民講學修
政求賢聽言六事上問近日貪風未革弇乞獎廉首
以陳壇陳昉對稱旨尋兼權右司時丁大全陰奪政
柄弇守正不阿有季全者其父及叔父皆為富民潘
應芾威使殺之事下憲司應芾數年不就逮反以其

弟爭產事訟季于漕司弇立督之俾直其冤出知台
州州有閔卒驕蹇日甚弇密訪倡亂者上制司誅之
弛其餘不問一州慴伏卒為大全所中罷去除侍左
郎中遷尚書右郎中弇在銓衡人皆憚於私請或規
弇性過於執方弇曰性拙所致豈能復刊為圓尋又
罷去除將作監淮東總領兼知鎮江府園田租取斛
面尤甚弇至悉從寬減舊買軍需取贏弇按舊籍率
三數年後方能追及倍稱之息又零取於將校所攤

之家囚繫多死者弇抑不行力請宣限支給恒使有
儲至於飭江防寬苗稅抑供需理冤滯聲績可紀久
之差知安吉州兩易知吉州挨實苗額繕完城郭覽
衢路作簽廳又葺浮梁州人名曰糜公橋詔兼提舉
江西常平景定五年卒年五十九弇性孝友睦族卹
貧畧倣范公義莊規約秉麾持節生業無所增所至
吏不能欺豪右屏迹立朝議政尤號知大體平居奉
養清約燕遊玩好絕不留意

鄭起潛字子升父時發閩縣人遊學吳中寓居天心橋
生起潛起潛篤志力學長通易寧宗朝登甲第累遷
崇政殿說書侍讀侍講為大禮執綬官除禮部侍郎
遷中書起居舍人轉直學士權兵部尚書貶贛州起
潛好浮圖說以端午日坐逝有旨歸葬陽山

陳振字震亨襄之後也父遵出贅李衡女因家崑山遵
死振幼貧無以葬得地圓明村卜者云不利長子振
曰使親藏得寧或不宜於振二弟尚可主祭遂葬焉

天性至孝以祿不逮養刻木為親像一飯必祭急義
樂善好汲引後進有過失必規正之為文簡健高雅
無宋季陋習有止安集五十卷好楷書有歐虞氣骨
官至太府寺丞知永瑞二州以朝議大夫致仕卒贈
通議大夫養子昌世亦以文鳴兼優吏事初為府丞
知信州以最聞擢吏部郎召對理宗有一廉可喜之
褒後知瑞州秩朝散大夫中歲絕欲自奉菲薄居官
所至有遺愛皆以節用愛人為本昌世子師尹明復

明復官朝奉郎通判慶元府

王可大郡人也嘉泰中知武岡軍有惠政疲氓得蘇清
靜鎮俗嘗以郡民不喜醫藥多殞非命刻方書以惠
之

楊應龍字汝濟系出關西曾祖敏求任徽宗朝官至朝
散大夫徙居崑山之外岡應龍才兼文武為戚里吳
郡王壻寧宗朝授武功大夫浙西兵馬鈐轄暮年勾
祠主管建寧府冲佑觀使所著五十萬言名曰進授

冊嘉言讜論發於忠忱手鈔六經百家之說為性齋知見錄凡三十卷又有性齋詩稿王袞黃由皆以將帥薦之未幾卒子光輔終承節郎孫滋生有神異歿于邊功理宗贈護國惠忠侯廟食里中

王介字元石郡人也由進士授昭慶軍簽書節度判官廳公事光宗久不覲重華宮介走書諷趙汝愚宜率百僚守和寧門竢六飛之動入為學官又上疏懇言之寧宗即位韓侂冑用御筆罷諫官介力改之開禧

二年為尚書度支郎首陳用兵之禍侂冑怒諷御史
斥去侂冑誅召為吏部兼右司累遷宗正少卿兼中
書舍人會不雨詔百官言得失介乞冊免宰相令史
彌遠終喪制張允濟以閣門宣贊舍人兼臨安府鈐
轄介謂此細事而用權君側破祖宗制不可封還詞
頭丞相語介此中官意介正色曰宰相逢宮禁意給
舍承宰相風旨朝綱掃地矣數日徙起居舍人出知
嘉興府又尹臨安改知慶元府卒年五十六謚忠簡

介初學於呂祖謙徙居金華娶鄭僑女僑實壻汪應辰故介文學有原委子埜

埜字子文以父蔭補官登第歷樞密院編修兼檢詳繼為副都承旨拜禮部尚書所奏陳皆明切可行為兩浙轉運判官以察訪使出視江防自嘉興至行在增修官民兵船守險備具嘉熙四年以江南西路轉運副使知隆興府除大理少卿歷沿江制置使江東安撫使行宮留守寶祐二年拜端明殿學士封吳郡侯

三年僉書樞密院事時丁大全用事嘗不快於埜誣
以在建康日盜用官錢遂主管洞霄宮憂憤而卒贈
特進埜師事真德秀知朱熹之學初建安書院祠二
先生工歌詩書效歐陽詢署書尤清勁官浙漕時嘗
被論埜以母年老托言改除母曰我已知之昔汝父
以忤時相去國今汝又如此我方以為喜汝復何憂
時人稱為賢母

周虎字叔子世為臨淮人靖康中徙居常熟為人倜儻

輕財尚氣慶元二年武舉進士第一授殿司步軍同
正將除武學諭閣門舍人充金國賀生辰接伴副使
知光楚二州開禧二年知和州時敵會諸道兵加渠
帥以平南盪江等號長驅直入圍和州甚急虎部分
將士乘城拒守其母何氏擁孫息期與兒偕存亡虎
謂父老曰吾國家守臣一朝去此則為奔亡之人失
節敗名生不如死效死弗去雖歿猶生吾計決矣合
戰凡三十四殺敵驍將以十數最後射死其右帥薩

克達敵引去於是和議堅決而江淮安焉虎推功歸
母進封永國太夫人故賞不及虎州人德之生為母
子立祠特轉武功大夫正任文州刺史除主管侍衛
馬軍行司公事特授成州團練使侍衛馬軍都虞候
帶御械器兼幹辦皇城勾閒提舉佑神觀言者指為
權黨坐謫徽州得旨自便復元官未幾母死誓不出
仕歸吳杜門托蹙除知和州特轉行一官者再辭表
至八九上得請乃已家居十二年雖舊所部候之亦

堅不與接紹定二年轉和州防禦使卒年六十九諡忠惠廟號忠烈虎有大將器功在江淮忠節罕比而文詞膽敏尤善大字名重一時

王柟字汝良節愍公倫之孫父述通判平江府初述負倫骨自河間返葬郡之陽山遂家吳中開禧中和議始成柟為城南廂官帥臣言其有異才被命出使擢帥淮西進尹臨安皆有聲績

孟猷字良甫元祐后族也祖忠厚封信安郡王判平江

府自有傳父嵩字嶠之直祕閣浙西安撫司參議官
猷居郡之間丘坊嚴已恕物不立厓岸立朝無黨與
未嘗示人以同異之迹歷婺州通判又知婺州四持
使節所至皆安其政令官至朝議大夫太府卿兼刑
部侍郎卒年六十七子繼華奉直大夫繼顯進士弟
導

導字達甫與猷俱學於葉適導通判臨安府盡心職務
諸司交薦之三遷大理正知江陰軍官至大中大夫

導孫文龍字震翁浙東常平幹官在儒林傳

朱天錫郡人也嘉定十年知丹陽縣盡心撫字務在不擾修創公宇留意學校邑人生立祠十四年以通直郎知武進縣官至知台州

趙琳字君善忠簡公鼎曾孫也父監字孺文范之柔以女兄妻之遂家崑山終知興國軍琳自進士嘉定十年為常州教授作亭表鄒浩墓歷宗正丞都官郎理宗欲用為諫官有沮之者出知吉州不赴旬祠而歸

後以朝散大夫直寶章閣致仕清修寡欲室無媵妾
惟藏書萬卷卒年七十八

方萬里字子萬其先嚴州人元符以來世登儒科萬里
幼失父伯兄永嘉簿賜復攜之侍母來吳因家焉登
進士教授江陰軍儲義廩置小學謹禮儀紹定五年
以朝奉郎知江陰軍累至太常寺簿贈正奉大夫萬
里問學履行遠近敬之趙汝述守平江遇之甚至汝
述卒賓客皆散去萬里獨護喪數程時人義之子洪

字養原進士

王萬字處一其先定遠人萬少居濠梁學舍慨然有求道之志熟讀論語忽覺有得登甲科授和州教授吏部架閣國子錄添差鎮江府通判除樞密院編修官兼屯田員外郎知台州嘉熙二年乞官觀又辭召命來居常熟復入為屯田員外郎兼編修改尚書右司仍兼編修崇政殿說書除監察御史首論史宅之故相之子曩昔弄權不當復玷侍從上命丞相諭旨迄

不奉詔尋出宅之知平江府又論之疏凡五上時蒙
古屢敗我師帝悔於用兵命學士吳泳草詔罪已泳以
萬忠伉有大志精於邊防遂以上意訪之萬曰兵固
失矣言之過甚恐亦不可今邊民生意如髮宜以振
厲奮興感發人心因為條具沿邊事宜泳從其說具
藁上進會時相有不協公論者萬上疏劾之且引歐
陽修之論趙括謂天下皆知其不可獨其主不悟者
最為莫大之患疏入即除大理少卿尋改太常少卿

知寧國府召赴行在奏事除直寶章閣宮觀再令赴
行在奏事仍直寶章閣福建提刑除直煥章閣四川
宣諭使司參謀官太常少卿並累辭不受家居累年
凝塵滿席淡如也淳祐三年卒年四十八五年詔王
萬立朝謬諤古之遺直為郡廉平古之遺愛可特贈
集英殿修撰仍撥官田五百畝會子五千貫贍給其
家十二年賜諡

於自得談

經不涉支離不為崖岸行蘊子法厚人莫窺察每

書事天二字以自警在朝與曹幽郭磊卿徐清叟俱負直聲號嘉熙四諫有文集時習編書志編若干卷王圭字君玉崑山人范成大外孫也父邁字德遠安吉人依妻家以居登進士終通判太平州圭起進士主松陽簿以才幹陞為令講行經界為天下式淳祐八年以監行在諸司糧料院出知常州屢蒙陞賞十年又以職事修舉轉朝奉大夫再任入為司封郎官終朝奉大夫其居官廉家無餘貲有文集十卷子敏學

強學

劉必成字與謀其先福安人來居崑山之湓浦必成少游國學嘉熙初七士同叩閭極言時事必成實為之倡是年七士俱與計偕而必成為武舉解元明年遂魁天下淳祐九年復中鎖廳蓋以文武全才自負也嘗兩入閣輪對慷慨言邊事上深褒美次日宣諭宰執曰必成所言極好後皆行之歷知潯州卒官湖南安撫副使有三分詩藁

阮登炳字顯之其先由周曾自周迪功郎浙東安撫司幹官祖太

誠贈朝奉

郎登炳世習禮記淳祐六年與計偕咸淳初免上南宮以亮陰賜狀元恩例授承事郎紹興府簽判兼福王府教導官改承議郎祕書省正字以論公田抗言迂衆斥予宮觀起為建寧府漆差通判入為祕書省校書郎歷著作郎祕書監丞權少監陞祕書監官至朝請郎元兵取臨安隨例入燕以病還鄉里年八十

二卒

王都中字元俞福寧州人父積翁仕宋寶章閣學士福建制置使宋主納土以全閩圖籍上元世祖授中奉大夫刑部尚書福建道宣慰使兼提刑按察使尋除參知政事行省江西俄為國信使宣諭日本遇害於海上都中三歲即以恩授從事郎順昌縣尹七歲從其母訴闕下世祖聞之給驛券俾南還賜平江田八千畝宅一區已而追念其父功不置特授少中大夫

平江路總管府治中時年甫十七僚吏見其遇事剖
析動中肯綮皆睥眄不敢欺崑山有詭易官田吳江
有違拒有司築堤護田者皆舉按其罪學舍久壞首
新禮殿秩滿除浙東道宣慰副使遷荆湖北道宣慰
副使歲侵躬履山谷以拯民饑除江淮泉貨監所鑄
錢號最精改郴州路總管谿洞猺獠皆悅服大治學
舍俗為之變隣州茶陵富民覃乙死無子惟一小妻
及其贅壻拜屍成婚歲隱玉杯夜明珠悉得其情而

正其罪郡歲貢金而金戶貧富不常考得其實乃更
定包銀之法以憂去民為立祠服闋除兩浙都轉運
鹽使未上擢海北海南道肅政廉訪使中書省奏國
計莫重於鹽筴乃仍如前除徧歷三十四場驗其物
力高下以損益之役既平而課亦足擢福建閩海道
肅政廉訪使遷福建道宣慰使都元帥又改浙東道
宣慰使都元帥天厯初被省檄整七路軍馬境內晏
然徙廣東道宣慰使都元帥三易鎮皆佩元降虎符

元統初以兩淮鹽法久壞命以正奉大夫行戶部尚書兩淮都轉運鹽使尋拜河南行省參知政事道以疾歸上閔其老詔即其家拜江浙行省參知政事卒謚清獻都中歷仕五十餘年所至政譽輒暴著而治郡之績尤偉有詩集三卷

劉岳字公泰祖開宋神醫世居星子岳讀書於白鹿書院宋季來居吳元世祖詔求南士岳應聘入見世祖詢其先世以開事對命以奉議大夫官太醫院時稱

為劉三點以其指點三下洞知六脈受病之源也未
幾詔以其文合古作可掌誥命改翰林學士中順大
夫知制誥同修國史廷事輒與議求外補授嘉議大
夫建昌路總管所著有東厓小藁

干文傳字壽道其先汴人五代祖武節大夫恭建炎南
渡僑於吳子孫因占籍文傳少嗜學十歲能屬文未
冠用薦為吳及金壇兩縣學教諭饒州慈湖書院山
長延祐中詔著取士令首以江浙鄉貢會試京師登

乙科授承事郎同知昌國州事州居海隅民頑獷羣
行剽掠海中文傳柔以恩信俗為之革遷承務郎長
洲縣尹諫訴轆轤歲輸糧四十餘萬文傳聽決趣辦
具有條理居公署未嘗輒出親舊莫敢通謁會行助
役法行省檄專任本縣之事召縣民善諭之無敢為
詭寄者再遷承德郎烏程縣尹胡瑗墓為僧壞據復
而表樹之丹徒民周有一女二子而二子共殺女獄
久不決憲司俾往鞠立得其情周母乞貸二子命文

傳謂二子所承有重輕乃議為首者當殺姊罪從者
免死使養母咸稱明允陞奉議大夫婺源州知州朱
熹先業并於豪民文傳呼豪折以理不俟窮治悉歸
之富民江出遊娶娼張氏為婦江既客死張間關數
千里返其喪舉前妻之子遇之不以禮重困苦之張
不能堪子恐生它變乃與弟共殺之瘞屍山谷間官
知其情利賄不問文傳曰為子而戕其庶母人道滅
矣遂論死朱某妻王無子朱納妾於外生子未周歲

王誘之來逐妾而留其子湛之水不死以帛經之乃死夜以醬塗死兒焚之朱知而無如之何文傳發其事死兒餘骨已至官王厚賄妾父母買鄰家兒以為妾兒初不死文傳令妾抱乳之兒啼不就乳妾父母遂吐實乃呼鄰婦至庭兒見親母躍入其懷就乳王遂伏殺兒之辜人以為神明陞朝列大夫吳江州知州以均徭賦為先催科追逮信立程限民亦不違村落之間不識吏胥至正三年召擢集賢待制朝請大

夫俾居宋史前局供職勤恪雖憊不少休三史以次成燕賚優渥乞閒以禮部尚書致仕陞嘉議大夫歸卒文傳為文務雅正不事浮藻有仁里漫稿若干卷陳謙字子平吳人兒時即知孝後父病革思鰕父沒遂終身不食鰕師事處士林寬教授龔璠皆勉令試有司既入院兵士搜檢無狀謙歎曰待士如此尚可以徵俸失得為哉即罷歸盡棄其業屏除世好潛心六藝旁覽百家而守之以約為文章馳騁上下尤善詩

賦虞集黃潛張翥皆論薦力辭乃止喜施予孫子翼
貧有女不能嫁謙許助之後孫病篤謙持貲往為畢
嫁事謙事兄訓甚謹丙申歲訓為江浙省照磨假還
張士誠兵適至訓謂謙曰汝無官守宜自為計謙曰
兄在吾何所之俄而兵突入室脅訓使拜不屈遂刃
其胷謙以身翼蔽之并遇害年六十三所著述甚富
兵後散亡獨易解詁二卷及古今詩數十篇傳

蔣堂字子中吳人父為州模長堂聰敏過人幼讀書有

大志及長以孝友稱與人誠敬中泰定鄉試後隱居
教授至正間用大府薦為嘉定州儒學教授有詩文
藏于家

朱德潤字澤民崑山人幼誦讀一過能記壯攻詩文間
得許道寧畫試加塗抹遂臻其妙延祐末遊燕京趙
孟頫薦之召見命為編修明年授鎮東儒學提舉以
歸喀喇庫庫亥桷皆與友善至正中浙省辟為參謀後
攝守長興招徠流離尋以病免卒有存復齋藁十卷

姑蘇志卷五十一

欽定四庫全書

史部
姑蘇志卷五十二

詳校官編修_臣曹振鏞

檢討_臣德生覆勘

總校官知縣_臣楊懋珩

校對官中書_臣李 燾

謄錄監生_臣張 恒

欽定四庫全書

姑蘇志卷五十二

明 王鏊 撰

人物十

名臣

高啟字季迪長洲人少孤力學工詩至正間張士誠
開府平江承制以淮南行省叅政饒介為咨議叅軍
事介有文學喜士啟時年十六或薦於介介見啟詩
驚異以為上客啟不屑去隱吳松江之青丘洪武初
以廷臣薦與修元史授翰林國史院編脩官命教功

臣子弟一日召見啟與編脩官謝徽俱對時已薄暮
上御闕樓擢啟戶部侍郎徽吏部郎中啟以年少未
習理財且孤遠不敢驟膺重任遂與徽俱辭於是賜
罷仍各賜內帑白金給牒放還復居青丘先是啟嘗
以史事為國子祭酒魏觀屬官雅相知契及是觀守
蘇為徙居城中延問郡中政事得失接見甚密會觀
得罪連坐死年甫三十有九啟身長七尺有文武才
於書無所不讀尤粹於史其文喜辯擊馳驟上下精

采魚發而詩尤號名家所著有缶鳴鳬藻二集

楊基字孟載其先蜀人大父宦游江左而基生吳中
遂家焉穎敏絕人九歲能背誦六經著書十萬餘言
名曰論鑒試儀曹不利會天下亂歸隱於吳之赤山
張士誠時辟為丞相府記室未幾辭去又客饒介所
王師下江南籍錄諸陪臣基以饒氏客安置臨濠旋
徙河南洪武二年放歸尋起為滎陽知縣謫居鍾離
久之被薦為江西行省幕官以省臣得罪落職六年

又起奉使湖廣召還授兵部員外郎出為山西按察副使進按察使後被讒奪職供役卒于京基尤工于詩初會稽楊維禎客松江往來吳中以詩自豪基嘗於坐上賦鐵笛歌維禎驚喜與俱東語所從曰吾在吳又得一鐵來矣若曹就之學優于老鐵學也至正洪武之際與高啟張羽徐賁齊名號吳中四傑所著有眉菴集

盧熊字公武其先本武寧人宋季徙家於吳再徙崑

山父觀字彥達讀書有至行門人私謚夷孝先生熊元季為吳縣學教諭洪武初以故官迫遣赴京母卒竟歸復起為工部照磨尋以善書擢中書舍人遷兗州知州為政務愷悌不求赫赫名州初罹兵革人情凋弊適大帥李善長營魯王府浚兗州河熊撫綏供億事集而人不擾俄以簿錄刑人家屬事坐累死先是熊嘗上疏言州印篆文譌謬忤旨至是竟得罪熊少嘗從學楊維禎博學工文詞尤精篆籀所著有說

文字原章句鹿城隱書蓬蛄憂幽石門清溪等集別
有蘇州志兗州志孔顏氏世系譜總若干卷子彭祖
字長嬰洪武末任湖州武康丞永樂初薦授禮部主
事坐事謫阜城為民尋徵詣行在冠帶聽用以疾卒
彭祖幼傳家學不事藻麗而求以適用為政亦有父
風彭祖孫瑛字克脩宣德五年進士官刑部主事博
學工書尤工畫竹

盧熙字公暨熊之弟洪武四年以薦授睢州同知時

中原兵革甫定歲復薦饑熙一意休息惟恐傷之明年行守事適御史銜命搜訪舊軍籍見民克之雖近千入檄熙拘送熙召民自實得嘗隸尺籍者數人畀之御史怒械繫曹吏必欲盡得不然以格詔論同僚懼議發民應之熙曰吾守民吏也民散吾誰與處乃自詣御史曰州已無籍軍今民且散走獨有同知在請以充役御史怒斥去堅立不動竟不能奪後卒於官貧不能喪官為具殮喪歸吏民挽哭者千人道遇

大雨無一人少却其得民心如此熙為人雅飭信厚
博涉經史亦善筆札子充穎字次農文學得於家傳
而制行尤高以能書薦留誥司將官之會熊死歸葬
誓不復仕充穎子儒字為已博學能文自負甚高亦
以薦官中書舍人

滕德懋字思勉吳縣人元季為江浙行省掾叅政多
爾濟巴勒討方國珍辟為叅謀度海颶風大作舟且覆
德懋神色自若國珍降留撫台州三年台人德之國

初徵擢丞相府掾從征陳友諒除知信州以才力不
逮辭改建昌同知時陳氏故臣王溥守禦建昌所為
多不法德懋以太義律之多所悛改進知潭州再進
湖廣行省左右司郎中召拜兵部尚書坐事卒德懋
才辯豪爽器量宏偉其學長於奏疏一時招徠詔諭
之文多出其手子枋字用載有文學與從弟權齊名
權在文學傳

錢芹字繼忠吳縣人少負氣節欲以奇功自奮元季

以策干諸將無所遇洪武初辟大都督府掾從大將軍徐達出北平絕大漠凱旋俄以例解職家居二十一年甘貧守道為郡守姚善所知語在善傳以洪武末詔求遺逸善以芹應詔召對稱旨留中議事授戶部司務北陲有警署行軍斷事從征虜將軍咨謀會軍府遣芹入奏道病卒瀕卒猶條邊事緩急上執政年七十二賜棺殮歸葬黃山

郁新初名某吳縣人隨父徙鳳陽之臨淮家素饒財

慷慨豪爽喜賓客樂賑窮乏洪武二十一年以人材
徵授戶部度支主事賜名新次年改官制戶部設十
二屬司遂陞北平部郎中二十四年陞戶部右侍郎
奏事庭中被顧問天下戶口數目漕運地里險易應
機響答無遺謬遂陞尚書永樂三年卒上顧翰林學
士解縉等歎息稱其才賜葬臨淮

余燦字茂本崑山人美丰姿少有雋才從殷奎陳潛
夫學得春秋之傳洪武初選授承勅郎進通政司叅

議拜吏部尚書煥為人長者其家故鑛工既貴造里中人家必戒其下云第稱余待詔兒勿云官人也

王英字俊伯崑山人洪武初從鄉校貢太學選授山東道監察御史上察其可用特命署都御史事大書敦厚王英四字揭諸殿柱尋授刑部主事陞郎中出為寧海知縣永樂初召入復為郎中陞陝西按察使任滿得代行至泗州卒英立朝兢兢謹畏每顧妻子曰吾以身許國其勿以我死生為意時有建白輒毀

其稿及長臬司以簡靜為治不事苛察其居鄉尤率
易嘗微服入郡城時禁庶民服鞞門者縛英英笑曰
吾官人也顧取舟中冠帶示之始得釋亦不色怒邑
令盛設酒饌邀英辭之竟赴鄰翁飯或怪之英曰鄰
翁貧治具不若令之易也鄉人至今傳為談柄云

王遜字謙伯崑山人以進士為監察御史降上高縣
丞帶罪殺賊尋以功復官遜明敏健刻憲度肅然雖
家居不少縱或謂曰君嚴自治邪遜曰吾讀書求道

矧已不治而能治人竟以訐直得罪死子復字從道
宣德五年進士亦終監察御史復子曰敏石門訓導
施顯字孟微常熟人洪武中鄉試會試皆第一選庶
吉士改前軍都督府斷事官又署北平按察司事坐
累謫遠州踰年乞留中自效拜江西道監察御史卒
於官顯讀書勤苦盛暑坐帳中帳頂皆黑子緒集其
文名兩魁遺稿

呂昭字克明崑山人嗜學敦行洪武中以薦授徐州

訓導上疏言民事稱旨改浦城縣丞縣故多荒地昭以俸資市穀給無產者俾藝其地而不責其償縣以富庶永樂中陞沁州知州父老持金為贈皆謝却之然僅至杭已不能僱舟狼狽而歸比赴沁道出徐州天寒尚未挾纊故所授經弟子共為買一毛裘僱一驢以往其子旦既舉進士昭遺書戒之曰進士美官然不能廉終非吾子死亦不歆汝祀其廉介如此旦字寅伯初任河南按察司僉事以事去職後以薦起

為建昌府推官正統間致仕性亦高潔環堵蕭然未嘗以貧窶為意及卒不能喪蕭山魏文靖公驥遣人買棺斂之

衛浩字季洪常熟人永樂初以太學生與脩高廟實錄擢監察御史出理幽薊諸郡文卷釐正宿弊時仁廟為太子留守北平浩入見言事稱旨賜經書食物尋丁外艱起復巡遼陽浩立朝讜論無所忌諱風節雖勁而存心近厚冤獄多所平反嘗有邊將繫其偏

裨失期者送京議死浩言宜聽立功自贖遂得免後
遷江西按察副使以老乞歸卒年九十一

黃鉞字叔揚常熟人洪武初以太學生授典史後登
進士第遷戶科左給事中以憂家居壬午歲自投琴
川橋下死

俞貞木初名禎字貞木後以字行更字有立石澗先
生琰之孫自少篤志問學尤工古文詞元季不仕洪
武初以薦授韶州府樂昌縣知縣丁父憂服闋改南

康府都昌縣復以母憂去後以親族犯法例弗起郡
守姚善雅重之延以訓子無何為鄉人所誣逮詣京
師卒貞木為人清苦敦行古道作官務崇禮化有古
循吏風晚歲益勵清節或炊爨不繼未嘗有所干請
人尤難之所著有立菴集若干卷

劉政字仲理以禮季子性聰睿肆力問學洪武己卯
以春秋中京闈鄉試第一時主考方孝孺批其文有
羣鳥中之孤鳳及吾當虛左以處之之語政平生忠

義自許壬午歲聞國事感慨不食死

朱吉字季寧德潤子洪武中以薦授戶科給事中時糧長稽違勘合皆坐死籍沒吉疏言勘合雖違而稅糧已足乞減死又乞寬胡藍黨禁以安反側皆從之後以善書改中書舍人尋改侍書出為湖廣按察司僉事坐事繫獄永樂中赦復為中書舍人年八十一卒吉有文學所著曰三畏齋稿子定安字士隆尤工古篆得周伯溫之傳嘗積其書草瘞之名篆冢春坊

中允吳均有篆冢記侍講王洪銘次泰安字士栗領鄉薦授內黃教諭歷安仁安吉歸仁三學次永安字士常亦善筆札皆清脩篤學不墜其家聲云

姚廣孝長洲人初為僧名道衍字斯道居相城妙智菴時相城靈應觀道士席應真者讀書學道兼通兵家言尤深于機事廣孝從之執弟子禮於是盡得其學然深自退藏人無知者其友王行獨深知之曰他日必當有所遇固不得以人廢言也洪武中以高僧

薦選侍文皇於燕邸深見親信與密謀永樂中以靖
難功進官太子少師復姓賜今名擬於元之劉秉忠
卒贈榮國公諡恭靖配享廟庭初靖難之功廣孝第
一事定未嘗自言文皇屢欲官之輒辭一日召見令
人潛以冠服被體亟命宣謝不得已受命終不蓄髮
娶妻所居多在僧寺然文皇眷禮彌篤每稱少師而
不名及病駕幸其第問後事對曰出家人復何所戀
強之終無言文皇念其功特官其養子姚繼為尚寶

少卿廣孝博通內外典亦工文詞所著有逃虛子集
別有道餘錄則專詆程朱其友張洪嘗云少師於我
厚今死矣無以報之但見道餘錄輒為焚棄

許思溫字叔雖吳縣人洪武中以貢入太學選署刑
部郎除監察御史改廣東揭陽知縣尋復職陞北平
按察副使洪武末改署大興縣永樂元年以守城功
陞刑部左侍郎奉表入賀轉吏部左侍郎兼左春坊
左贊善署尚書事六年卒年四十三洪熙初追贈吏

部尚書遣官祭其墓官其子俊為太僕寺丞

曾燿字日章以字行吳江人父朴浙江醫學提舉自杭徙蘇日章博學有材智受春秋於魯道源洪武間以歲貢授黃陂知縣秩滿以最聞陞翰林侍讀同脩永樂大典奉使交趾還陳黎氏篡立本末當征在軍中多贊畫之功交趾平復承命往諭卒于富良江子堅字孟堅亦以春秋起家拜禮部郎中擢四川左布政尋改雲南

平思忠吳江人初為縣小吏永樂中被薦授禮部主客司主事進郎中時文皇方事招懷主客務方殷思忠有精力事皆立辦尚書呂震特器之俄以事下獄北人入貢他任主客者多不稱旨震因以思忠為言即日赦復其官時以給事中楊弘為陝西布政欲使清强有力者伺察之遂拜思忠陝西叅政未幾為人所誣謫戍北邊會有詔市馬西域以思忠嘗官主客多識賈胡詔釋其戍給冠帶隨太監劉馬兒使吐蕃

諸國而還後卒於家初郡守況鍾官主客與思忠有
交承之分至是數延見思忠執禮甚恭且令二子給
侍曰非無僕隸欲使兒輩知公為吾故人耳其見敬
如此然思忠居貧自守未嘗以事干鍾人尤多之

何源一名德源字幼澄吳江人洪武間領鄉薦授保
德州學正陞德州知州歲旱隣治多蝗不入源境陞
梧州知府梧有水患民多流亡衆議具奏賑之德源
曰若俟奏報民皆死矣乃首捐已俸次募義民出粟

賑給民多賴之又悉毀境內淫祠以註誤謫交趾英
國公張輔舉署交州學事多所造就士之以貢選至
方嶽者十餘人後召為吏部考功員外郎出為鄭府
長史復改吏部文選郎中正統間擢江西右布政致
仕源為人溫雅歷事五朝文章政事見稱一時卒年
八十六

王汝玉名璣以字行其先蜀之遂寧人六世祖極仕
宋為吏部侍郎僑居吳中遂為長洲人父立中字彥

強元末老儒仕開化慈溪二尉陞紹興路治中歷知
無錫嘉定二州進知松江府入國朝致仕有文學善
畫汝玉穎敏強記年十七中浙江鄉試洪武末以薦
攝郡學授應天府學訓導擢翰林五經博士永樂初
進檢討再進春坊贊善預脩永樂大典仁廟在東宮
特深眷注嘗與學士解縉應制撰神龜賦汝玉第一
名大振然忌者衆竟以他事下獄死洪熙初追贈太
子賓客諡文靖遣官祭于其家汝玉為文兼古今體

製而賦尤瞻麗詩語雋永得唐人風格舉筆數千言頃刻立就所著有青城山人集

王璉字汝嘉汝玉弟少坐累謫戍五開後舉明經為武昌府學訓導陞大庾教諭永樂初召脩永樂大典克副總裁又修五經四書性理大全書成留為翰林五經博士進侍講洪熙初開弘文閣命楊溥陳繼及璉日直其中禮遇甚厚宣德元年卒璉文章不及汝玉而理致為勝制行醇篤楊文貞公尤重之汝玉兄

璉字汝器洪武壬子簡會試七十八人授編修使肄業文華堂命宋濂為師璉在選中後為吏部主事卒所著有錦江類稿論者謂其文學不減二弟而早卒不甚著故人無知者

金問字公素吳縣人父道玄見孝友傳問少受易俞貞木家貧無書從人借讀無不通解永樂初被薦為司經正字時宮僚多得罪問亦坐繫獄十年非義相餽皆不受時黃淮楊溥同坐繫三人相得甚省躬念

咎之暇各持一經講論曰此處憂患之道也洪熙初
命待詔思善門制授翰林修撰備顧問論時政得失
悉見獎納宣德末擢太常少卿兼翰林侍讀學士正
統間調南京歲餘遷禮部右侍郎卒于官問文行敦
茂義聞流著平生閱履否泰相尋而不變所操製述
雅健精采奕然善書得魏晉筆法星厯之學尤精然
未嘗以語人有集若干卷兄聲亦好古嗜學問事之
如嚴師嘗病熱劇醫云必得螺可治方盛寒問解衣

循河覓之得百枚以進病良已子汝進太僕丞

楊翥字仲舉吳縣人宋和恭武王存中八世孫少孤
貧與兄成武昌為鄉校師有狂生侮詈之翥若不聞
人以告翥曰豈無同姓名者邪人服其長者久多化
之楊文貞公士奇漂寓武昌偶憩翥館以無資告翥
遂讓其塾自教授他所日往返十餘里不厭比文貞
當路乃相引拔仁宗素知翥遣使驛召之授翰林編
脩陞脩撰與脩三朝實錄遷邨王府長史而歸景帝

即位翥朝京師命為禮部左侍郎食祿致仕又二年復朝進尚書加祿仍歸翥篤行不欺仁厚絕俗隣人作室簷溜落翥家家人不能平翥曰晴多雨少何必校也又鄰人老得子翥恐所乘驢鳴驚之即驚驢徒步入朝猶子懷金入市為人攘去以告翥不答或請理于吏翥不許文貞公落新第亟邀登堂曰舍初成得吉人首臨之其寬雅德度一時著聞至今鄉郡以為口實為文章平實有理如其人年八十五卒詔賜

葬祭召其子瑋入朝問所欲為官對曰願得本縣主簿從之

張洪字宗海常熟人洪武間以事被逮謫戍雲南後以明經被薦授靖江王府教授永樂元年擢行人奉使日本卻其餽金二年復使遼東修茶馬舊政于邊界亦不受餽時緬甸宣慰那羅塔殺孟養宣慰刁木旦併其地命洪齎詔責還所侵地立孟養後塔不服凡六往始聽命塔欲毒之服其誠信乃已還入翰林

修永樂大典克副總裁書成陞行人司副洪熙元年
陞翰林院修撰致仕卒年八十四所著有四書解義
周易會通尚書補傳詩經正義春秋說約禮記總類
歷代詩選史記要語琴川新志日本補遺等總若干
卷

吳訥字敏德號思菴常熟人七歲能背誦五經正文
父遵道為沅陵縣主簿被繫至京訥乞自代事未白
而父沒治喪如禮不用浮屠訥力學尚義兼善醫術

永樂間以醫士舉至京懇辭仁廟時監國聞其名命
教功臣子弟俄遷監察御史出巡浙江削秦檜碑表
陸贄里修岳飛墓動皆扶植綱常次年巡貴州恩威
並施羣夷畏悅將代還夷人相率詣闕請留不許宣
德五年陞右僉都御史尋陞左副都御史致仕年八
十六卒訥為人端重純明履方居約不以窮達易所
守其學務遵儒先為文根據義理有裨世教所注有
小學集解文章辯體性理羣書補注行世追諡文恪

彭韶贊云古貌古心學窺性理孝義幼聞實形踐履
避迹儒醫監國所禮乃教世胄乃司風紀卒貳憲臺
清德莫比篤老劬書以忘憂喜修正遺文垂訓無已
尤安禮字文度長洲人父義字從道元末師陳基學
辟樞密掾遭亂屏居二十年洪武中舉人才授湖廣
布政司經歷以廉謹稱性沈厚明哲處患難不失守
著元史緝要藏于家安禮尤純厚少從父寓武昌與
楊尚書耆楊文貞士奇友善相厲以德業歸補生員

嘗行從委巷邂逅一妹若將獻笑者安禮亟引去後
不復由是路同學生陳文學當遠戍泣告安禮吾必
不生還妻當弗能守奈幼女何安禮曰安禮在子勿
恤此吾有子當娶之已而陳果死妻乃克守義安禮
無子以弟之子為後即聘之弟以女有疾不可安禮
曰吾豈食言於亡友卒娶之安禮教諭崇安秩滿諸
生詣闕請留上命增秩還任尋擢武庫郎中有馬主
事面肆謗詈安禮走避徐言曰馬君改常矣旬日馬

死擢貴州叅議病歸不出太守沉鍾朝京師文貞問
安禮起居鍾謝不知及歸往候之見所居隘陋欲割
官地益之堅謝不受安禮平居若無可否至辨認理
欲毫芥不苟孫淳字公厚為平陽教諭遷知鉛山縣
改永年居官廉慎致仕歸卒

顧巽字順中長洲人受易于鄉儒周傳為程文敷腴
華鬯理趣兼得行輩敬服之永樂十二年以易魁鄉
試又十年始上春官甲辰年登進士第未授官卒當

時從巽授經者甚衆而賀廉孔友諒顧珣輩皆中魁
選吳中易學實始於巽巽子睢亦以家學正統丙辰
第進士官監察御史有風裁遷福建按察副使改戇
州知府致仕卒睢子餘慶成化壬辰進士由工部主
事累官河南參議巽睢餘慶俱以辰年進士士林奇
之

陳繼字嗣初吳縣人父汝言見寓賢傳繼生十月汝
言坐事死母吳攜歸蘇家具蕭然惟存書二萬卷其二

母守節教繼繼長從王行學再從俞貞木遂以古文
名三吳遠近交聘為學官以親老辭先是楊文貞公
士奇見繼文喜之會仁廟即位獎用儒術遂上言繼
文學宜在近侍即日詔驛召之既至授國子博士明
日入謝改翰林五經博士時初開弘文閣延文學之
士以備顧問命學士楊溥侍講王璉及繼三人領之
宣德初預修兩朝實錄進檢討踰年引疾致仕卒於
家繼為人端恪其學自經史百氏皆博考深究文章

根義理辯體製嚴矩矱不肯苟率一時稱為作者所
著有怡菴集子寬字孟賢完字孟英皆能文而寬尤
長於詩新麗和平頗得唐法寬同時又有徐庸用理
賀甫美之顧亮寅仲王越孟南孫寧繼康自後又有
常熟陳蒙吳江吳璩皆以詩名

陳祚字永錫吳縣人永樂中以進士選為翰林庶吉
士擢河南布政司右叅議以言事謫為太和山佃戶
十年宣德初名為監察御史疏言帝王之學先于明

理明理在于讀書讀書貴乎知要惟真德秀所著大學衍義載聖賢格言古今治亂而且要切乞常御經筵講說庶知孰謂道義可遵孰謂嗜慾可節孰謂忠賢可親孰謂邪佞可遠孰謂民利可興孰謂民害可革古今若何而治若何而亂政事何由而得何由而失等語疏入或摘其語以動上上怒逮繫至京并籍其家下詔獄五年正統初釋之復其官祚以父母庾死獄中乞追服不允章再上得給假歸葬還朝出按

湖廣復以言藩府事逮至京論死尋得解改南道時
戶部侍郎吳璽薦主事吳悅悅有過被劾法當連坐
而有司私憾璽附致至死悅亦自經祚言刑部大理
符同深刻乞各坐以變亂成法罪上可之且以其言
定為例八年陞福建按察司僉事數月以病得請致
仕歸年七十五卒祚為人風神峻整音吐剛厲中雖
少容然襟懷坦夷褒善薦才持法平恕身屢危而氣
彌厲忠誠激發蓋得之天性云所著有小學正誤子

寧新野王教授寧子悅永定知縣

張勗字勉夫吳縣人父以常永樂甲辰進士為河南
遂平知縣改永平灤州學正勗侍學于灤永樂丁酉
中順天府鄉試授揚州江都縣學訓導秩滿用薦試
上國觀光賦等題陞監察御史勗以身許國知無不
言嘗出按山西體察民隱密封奏之其言激切有古
諫臣之風而不便者媒以他事必欲陷勗以死賴宣
廟明聖卒保宥之陞廣西布政司右叅政丁母憂歸

未幾卒年止四十有九勗氣宇剛方閨門之間亦以之為矜式

虞祥字仲禎崑山人永樂中領鄉薦授金華府學訓導陞上虞縣學教諭宣德中選擢禮科給事中進通政司叅議再進戶部右侍郎改兵部卒祥為人謹飭達大體自校官入諫垣及以大臣巡視畿甸所在著聲云

王永和字用節崑山人永樂甲午中應天鄉試以母

老就乙榜授嚴州府學訓導改饒州適大成殿弊言
於太守欲葺之太守難其事永和毅然曰公不見里
巷孺子始就外傳猶知尊禮孔子公乃不知所本邪
秩滿入為兵科給事中劾奏錦衣指揮馬順怙寵驕
恣欺罔不法等事後持節冊封韓王世子妃糾正中
官蹇傲之罪進都給事中尋陞工部侍郎巡撫淮右
奉命治徐州呂梁二洪正統己巳死于土木之難贈
資善大夫工部尚書官其子汝賢大理評事次子汝

敬天順己卯經魁又次子汝霖正統戊辰進士初任吏科給事中累陞河南右布政使

劉璉字廷璉崑山人永樂十年進士任陝西道監察御史陞山東布政司右叅政洪熙元年叅贊宣府軍務宣德十年兼督邊儲陞戶部右侍郎尋轉左侍郎仍兼巡撫累降勅褒獎有秉公正之心勵廉潔之行勤謹詳明夙夜無懈之語璉公勤廉謹人不敢干以私在邊數年終始如一日其後都御史李秉督邊儲

悉依璉法景泰二年致仕卒于通州不能歸遂即其地葬焉天順三年葉文莊公盛叅政山西奏璉在邊年久保障有功乞恩褒恤於是朝廷遣官諭祭遷葬崑山

李蕢字茂實長洲人永樂中進士釋褐除兵部武選司主事歷員外郎郎中在武選司二十年受知於尚書方賓陞太僕少卿靖遠伯王驥征麓川奏蕢為佐俄丁父憂詔起復視事事竣陞工部侍郎始乞持服

服闋以兵部尚書鄺埜薦改兵部侍郎卒于官蕡勤敏有吏材習知兵事所在著聲性沈厚不苟居鄉里未嘗以貴加人每出必步過里門上馬終其身如一日同時有劉紹目繼初者由兵部郎中累官廣西兵備副使時稱劉司馬亦以厚德稱蕡妻之父也

夏景字仲昭崑山人先冒外姓朱氏登第後始復今姓景以經術進而書法特妙由庶吉士改中書舍人文廟嘗試其書第一特命書諸宮殿榜遂賜第宅免

朝叅眷顧極隆初景字作昶因名見上曰日豈可從
傍宜加永上遂為更定故今字皆從之其後遷考功
主事正統中出知瑞州府入為太常少卿進卿致仕
景為政不事名譽而人安其平易居家孝友而風流
文雅有高人之致詩詞清麗尤工畫竹石擅名天下
至於朝鮮日本諸國皆懸金購之兄昺字孟暘亦善
書初為永寧縣丞謫戍隆慶景既被遇文皇問問其
書所自以昺對即日命馳驛入見試書稱旨授中書

舍人

張益字士謙吳縣人少長京師登進士第入翰林為庶吉士授中書舍人轉大理評事與修宣廟實錄書成遷翰林修撰進侍讀學士入內閣典機務正統末死土木之難贈翰林學士謚文僖益為人清淳端謹文章圓熟對客數千言援筆立就楷書亦工初益與夏景同年及見陳嗣初王孟端俱喜作文寫竹後景見益作石渠閣賦出已上遂不復作文益見景竹妙

絕亦不復寫竹竟各以其所能名世

劉鉉字宗器號假菴長洲人少孤力學永樂中以善書徵入翰林明年中順天府鄉試授中書舍人預修三朝實錄成陞兵部車駕司主事進翰林侍講正統戊辰選進士為庶吉士命鉉教之日有程限詩文經改竄者一字未穩閱旬猶為易之明年陞侍講學士景泰中兼經筵講官會大旱遣祀濟瀆有司餽遺皆峻却之用少傳高穀薦為國子祭酒嚴教條以約諸

生無敢倖進者天順改元擢為少詹事日侍皇太子
講讀卒上聞嗟悼曰安得學行醇篤如斯人者邪命
官諭祭賻贈有加鉉為人介特自持言行不苟與人
交一以誠信權門要路未嘗一迹官位已崇猶僦居
隘巷當時楊士奇楊溥相推許有古君子之行平生
耽嗜羣書至老彌篤為文渾厚詩春容豐贍皆有法
則所著有假菴稿成化三年追贈禮部侍郎謚文恭
子瀚由進士歷官大理寺丞出為陝西按察副使致

仕有吏材亦謙謹有父風

諸質字叔義吳邑人由舉人典教永年改慶元遷國
子學錄進監丞擢翰林編修仍理監職以憂歸遂請
老以卒質為人誠信端直每事審義而行恂恂引退
若懦夫至論事裁決侃然不撓陳敬宗為祭酒剛嚴
少許可質以事請輒降顏譚講質居錄常攝丞居丞
常攝堂事同輩嫉之伺察終無疵可指同邑夏瑜字
公瑾由進士累官考功郎中居官請託不行為用事

者所誣謫戍雲中景泰初遇赦復職致仕天順初再徵以疾不起卒於家為人朴茂清慎時稱為長者又有長洲鄭鋼字德新既領鄉薦母亡十年不仕正統乙丑授趙州學正遷吉安府教授再遷寧王府長史致仕操履端潔經學精醇而教人有古誼二學至今祀之瑜鋼與質雖先後不一時而人並以厚德同稱仰瞻字宗泰長洲人永樂中以鄉貢進士授虎賁衛經歷遷大理左寺丞正統間宦官王振用事百司多

奔走其門時大理卿薛瑄少卿顧惟敬及瞻獨不往
會辦蔚州衛兵沈榮寃獄益忤振遂謫戍大同景泰
初刑部尚書俞士悅左都御史陳鑑言其以鯁介受
竄召為右寺丞持法愈堅在位者多不合遂引年辭
歸加大理少卿致仕所著有小學講義歸休文集瞻
尤篤長者之行有夏時建中者嘗任郡學訓導瞻嘗
師之後瞻經其門必下驢趨而過人竊窺之雖暮夜
亦然

顧惟敬吳縣人永樂中以薦授中書舍人累陞大理少卿初仰瞻得罪用事者意在薛瑄及瞻詞不連惟敬惟敬曰吾與瑄瞻同寮事得分治豈可使二人獨蒙其罪因自請逮治願與俱謫然迄無所坐止降四川某州知州未幾乞歸家居以禮自持不妄交際年八十餘終

陳鎰字有戒吳縣人舉永樂壬辰進士擢監察御史歷湖廣山東浙江按察副使宣德乙卯邊務方殷特

陞都察院右副都御史鎮守陝西兼督寧夏延綏等處邊備尋陞右都御史入掌院事轉左都御史時陝早甚陝人思鎰連章上請乃以太子太保出鎮至則禱於西嶽得雨人情大悅開倉賑濟全活甚衆鎰在陝十餘年領勅八十餘道悉聽以便宜鎰亦竭誠殫力知無不為陝人德之家繪其像云旱禱之則雨病禱之則瘳蓋事之如神云年六十三致仕卒錄其子伸為刑部照磨追謚僖敏其弟子僕字汝翼舉進士

由南京河南道御史陞四川按察司僉事時蜀有夷寇僕練兵且探得夷情寇悉破散舟濟汝南溺死人多惜之

俞士悅字仕朝長洲人自幼讀書過目即成誦永樂乙未進士擢監察御史陞湖廣按察副使綱紀振肅貪濁悉自引去居民不戒於火延及臬署僚屬皆奔避士悅具衣冠向火再拜風徐返火滅歲旱有司用道家法焚蛇磔燕而旱彌甚亟命屏去乃齋沐露禱

得雨連三日秩滿陞浙江叅政初至佯若不解事者
羣吏易之越三日發奸擿伏如神豪猾破膽正統壬
戌倭寇犯境士悅城汴潏二浦以備至今賴之尋陞
河南右布政使甫三日召還陞大理寺卿己巳之變
陞右都御史留守京師協都督衛穎帥師六萬守德
勝安定二門士悅晝夜籌畫甲冑未嘗去體事平陞
刑部尚書進太子太保天順改元謫戍遼東成化初
赦還復其官卒年八十士悅儀表魁岸面色如鐵聲

如洪鐘不類南產平生剛方侃侃見者畏服

徐輔字輔德長洲人由鄉舉授安吉訓導擢給事中
封駁無所避陞湖廣按察僉事歷湖廣右叅政輔平
生厚德長者輔同郡潘純字粹中徐傑字以立周賢
字用希郭璘字孟潤陸嗣昌字宗盛居官為政皆清
介醇謹而望亞於輔

徐有貞初名程字元玉吳縣人洪武初家以閭右徙
南京有貞天賦絕人嘗從吳訥游訥與俱見祭酒胡

儼儼初易之使面賦詩立成儼蹶然驚起曰徐生鼎
鉉器也宣德八年登進士入翰林為庶吉士時庶吉
士二十有八人有貞試常居首授翰林院編修歷修
撰侍講正統己巳以近臣分守要害有貞得河南之
彰德練戎卒糾機壯為京師聲援還遷春坊諭德會
河決張秋七年不治漕運道絕有貞自言能治乃擢
僉都御史往治之至則罷散役夫自乘小舟究河之
源委具言宜用古人治河之法先於上流開渠置閘

分殺水勢乃可築其缺口因作制水之閘疏水之渠
渠起金隄張秋沙灣凡百餘里而至於大瀦之潭踰
范暨濮又數百里經澶淵以接河沁用平水勢凡河
流之旁出不順者則堰之堰有九長袤皆至萬丈其
水不衝沙灣乃更北出以濟漕渠於是始築其缺先
是有發京軍疏河之議有貞請蠲瀕河之民庸役專
事河防三年而功成遷左副都御史天順改元迎復
功即日進華蓋殿大學士明日進兵部尚書掌內閣

事尋陞奉天翊衛推誠宣力守正文臣特進光祿大夫柱國武功伯食祿一千二百石有貞寵遇既盛時時與上面議他臣不預聞也初石亨曹欽與有貞同功其後亨欽所為多不法有貞每抑之會御史楊瑄劾曹石不法事二人以為有貞嗾之也乃晝夜謀攻有貞嘗有密議亨等令人屬耳得之遂以告上誣徐有貞泄其語上不能無疑下之獄尋出為廣東叅政曹石怒未已會有投匿名書者指為有貞下錦衣獄

雜治之無驗適承天門災乃宥之編置雲南金齒三年曹石敗乃賜還年六十有六卒于吳有貞為人短小精悍其學自天官地理兵法河渠陰陽方術無所不通詩文雄偉奇麗詞尤妙絕晚而喜作草書適逸變化人莫能及所著有史斷若干卷奏疏雜文碑銘記序歌詩樂府通若干卷

葉盛字與中崑山人由進士授兵科給事中正統己巳車駕蒙塵盛帥同列劾將臣朱勇等扈從失律之

罪請誅之以謝天下然後乃選將練兵問罪讎敵以還聖駕聞者壯之命掌科事時京師戒嚴四五日間疏凡七八上皆軍機要務敵既退封賞有功而未及死事者盛言通政使謝澤都指揮韓青都督武興御史趙麟皆當錄其後卹其家從之擢都給事中時內閣大臣奏留邊將防守京師盛言今日之事邊關為重向使獨石馬營不棄則六軍何以陷土木紫荆白羊不破則敵騎何以薄都城若但僅守九門其如陵

寢百姓何時北敵奉駕還京將入關矣有投匿名帖
言迎復事大臣不敢以聞盛曰此野人無情之言達
于上感動必矣或沮以匿名書者盛不顧具疏言之
詔令封進雖留中而正論有不泯焉三年遷山西右
叅政巡撫都御史李秉舉盛協贊獨石馬營等處軍
務時獨石馬營八城失守殘毀殊甚盛列其利害為
八條次第罷行之盛以邊人多不知學奏置社學於
諸城中推有文學者為之師買經書字帖以給貧者

一時軍中子弟絃歌相聞赤城鵬鶚雲州龍門長安等八城相去遠甚無邸舍風雪寒雨行者病之盛於官道傍每十里為垣屋一區中置爨卧芻秣之具守以邏卒名曰煖鋪過者如歸諸城附郭膏腴地俱為權力所占盛理出之得五千餘畝自將帥參隨至軍餘皆分授之限以周垣題其門曰某隊菜圃人得均其利焉初軍中百需皆斂於軍盛因請官銀五千餘兩買牛具奪勢要所占屯田謫戍卒之不任戰者給

與牛種耕之課其餘糧凡軍費皆於是取給自是邊人効力歲亦屢登以外艱歸天順改元召擢都察院右僉都御史命巡撫兩廣初兩廣守將不相統攝盛請於梧州建帥府命征蠻將軍總鎮于此兩廣各設副總兵及叅將分守要害悉從征蠻節制又許鹽商計鹽多寡入米餉邊公私利之會有譖於當道者取還改左僉都御史巡撫宣府各邊屯堡多廢盛建議脩復邊人不悅謗聞京師盛任怨力主其役不數月

築完計七百餘所自是兵民畜牧自如得免寇掠成
化三年進禮部右侍郎尋改吏部左侍郎時方冀其
大用俄無疾而卒年五十有五詔賜葬祭諡文莊盛
平生力行好古清脩苦節動慕范文正之為人為諫
官論事不激不隨取人先行檢而後才藝終不及人
之過亦不輕薦一人考古辯疑殆忘寢食而於世俗
聲色貨利澹然不以經心其文章紆徐委備有法則
彭韶贊云希文不相古今所惜人以為知言

韓雍字永熙長洲人父行役京師生雍于彼登正統壬戌進士授監察御史時方年二十或少之東鹿王驥為都御史獨器重之有重務或巡大藩輒奏委之所至伸冤抑鋤強梗黜貪殘名聲大振碭山教諭丘純答死膳夫當刑雍訪膳夫於河南獲之蓋其父密使之逃以他屍汙讎之也純得復職及巡江西閩寇鄧茂七反巡按御史汪澄牒鄰境勦殺尋復止之雍曰律有反叛會捕之文使賊果降何憚發兵不然吾

有備無患即趣進時浙江巡按黃英以汪牒調兵弗
集汪卒坐死人多咎英而偉雍還陞廣東副使少保
陳循疏雍才陞都察院右僉都御史巡撫江西至則
首行均徭歲辦法均徭者均平十排年之力役歲驗
冊編役役畢九年無擾歲辦者里甲釀銀貯於官有
役則估直支給擇戶領解人稱便焉天順初改山西
副使未幾陞大理寺少卿復僉都御史錦衣衛指揮
劉敬嘗請石亨飯坐朋黨雍言一飯而擬朋黨日與

亨燕會者當何罪邪敬獲免復巡撫大同宣府築邊
牆括隱役撥用給種歲收以備買馬造兵之用陞兵
部右侍郎成化初被累出為浙江左叅政時兩廣寇
弗靖將出師廷議唯總督之任難其人兵部尚書王
竑曰非韓雍不可遂改雍左僉都御史會都督趙甫
等於南京議兵所向僉謂賊寇廣東宜逐之寇廣西
宜困之雍曰不然大藤峽為賊巢穴舍此而致於賊
非計也行抵廣西遣偏師平陽峒諸賊擒其魁磔以

示衆先是指揮某失機數其罪斬之軍威大振乃分
兵為二十五哨各授以方畧雍與太監總兵統中哨
先攻修仁荔浦諸峒克之進次大藤峽衆云峽乃天
險且賊已有備不如以大軍圍之俟其自斃雍曰兵
貴神速峽周圍六百餘里縱有甲兵數萬豈能斷賊
出入相持日久老師挫銳不如長驅擣其巢穴且遣
守將歐信帥師由山北取道與大軍合擊復分兵截
其要路時賊於山南立排柵甚固滾木礮石標鎗藥

弩如雨而下雍選壯士用團牌扒山虎等器殊死而進奪其要塞焚其積聚煙焰障天賊遁歸九層樓懸崖絕壑不可復進雍不顧督兵破山開路棄馬步戰賊復用礮石大木推轉而下久之賊矢石稍盡雍率軍猿攀蟻附而進密遣壯士於絕頂舉砲為應賊方驚駭諸軍四面夾攻會歐信等亦至俘斬不可勝計餘黨皆降雍曰賊雖降不能保其不叛乃改大藤峽為斷藤峽徙上隆州於峽內更名武靖立土官以司

之又置藤縣千戶所以鎮壓之遂刻石紀功而還捷
聞擢左副都御史旋以父喪歸再起為右都御史總
鎮兩廣蠻夷震懾以父呼之而不名久之與中貴人
黃沁不相能乃以病歸卒於家雍長身俊偉落落有
大節具文武才畧天下咸傾仰之於詩文若不經意
而豪邁疎爽人亦罕及

沈訥字文敏崑山人正統間以進士授大理評事尋
陞寺副景泰間出為福建按察僉事督松溪銀冶正

額外不求羨餘時慶元盜起遽入松溪訥以計擒之
得不滋蔓尚書孫源貞上其功遷副使歲餘卒訥為
人高潔弗可其意者視之漠如也為文章必貴已出
同時作者鮮當其意故聲望屹然而謗議亦及之所
著文曰兔園遺冊下里餘音

施槃字宗銘吳縣洞庭山人自幼警敏異常兒既長
不屑就家人生業奮志於學從父遊淮陽就師授經
久之歸補縣學生正統三年領鄉薦明年試禮部皆

前列廷試第一授翰林修撰年甫二十三既入翰林日讀中祕書大有進益其力學之勤致行之篤尤為楊文定公溥所重未踰年而卒天下傷之

陳鑑字緝熙長洲人父潤謫戍蓋州道京師過其故人范叔瓚即以鑑託之久之叔瓚家人不能容乃以貽王一居太卿為道士一居命索債浙東乃從師受學債一無所問徒市書數篋而歸一居奇之使卒儒業正統十三年賜進士及第入翰林為編修景泰中

祀北鎮醫巫閭旋充講官進脩撰天順初奉使朝鮮
預脩一統志遷侍讀修英廟實錄成進侍讀學士未
幾命為祭酒初國子月給錢為會饌費然斂散不常
多不時給則貯為公費其來已久會有不快於前祭
酒邢讓者言讓以公錢入已事并及鑑會官廷問讓
辯不已鑑曰吾為祭酒安能對刀筆吏掉口舌竟不
吐一詞適有從中醞釀之者與讓俱除名未幾卒鑑
平生無聲色之奉多藏法書名畫其使朝鮮以妓女

侍作詩却之夷人敬服所著有方菴集若干卷

吳惠字孟仁吳縣東洞庭山人初洞庭山未有登進士者登進士自惠始選授行人嘗持節使占城涉海七日遇颶風同行者倉皇莫措惠神色不變特為文祭禱海神而已使還擢桂林知府時義寧峒蠻結湘苗煽亂三司議進兵討之惠請宜先招諭乃單車親抵其峒開誠慰撫蠻遂服武岡州盜起宣言推義寧峒主為帥義寧蠻畏惠其主自出訴武岡盜計遂衰

在郡十年陞廣東叅政致仕惠性慷慨疏財篤義居官三十年田廬不改其舊家居日飲酒賦詩尤善行草子鳴翰風流俊逸詩文清麗尤精小楷詩成必親書輒為人持去無稿累困場屋以吳庠生卒

吳凱字相虞崑山人父公式早亡遺腹生凱能力學養母幼時里胥見役即詣縣自陳有母不能遠離竊有志於學時縣令芮子翔異其言立遣就學後充貢京師中順天府鄉試宣德中授刑部廣東司主事改

行在雲南司再改禮部主客司以母老乞歸遂不復仕凱精敏有治劇才平生以禮自律一言行不苟風儀嚴峻人望而畏之家居四十年非公事不至公府葉文莊盛尤重之嘗曰鄉里作官前輩當法吳丈後輩當法蘊章蘊章謂孫瓊也

孫瓊字蘊章其先長洲陸氏以父後崑山孫道庠遂冒孫姓家崑山舉進士授刑部主事累陞郎中時錦衣指揮門達用苛刻羅織人罪法司承望風旨往往

死非命惟瓊多所平反太監牛玉假子犯法囑瓊
不少貸由是積怨權貴竟以同官得罪連坐謫戍遼
左成化初復官月餘即乞致仕年僅四十家居篤於
禮度終日端坐未嘗傾側所居朴陋人不能堪而處
之裕如子裕乙未進士官終知州

張和字節之崑山人讀書數行俱下為文章立就正
統己未登進士移疾歸久之景泰庚午主考江西鄉
試授南京刑部主事膺召纂修祕閣天順初還南京

歷員外郎郎中擢浙江按察副使提督學校以疾卒
和為人廉介權貴之門不一濡足聞忠賢節義事喜
躍如自已出朋友有過面折不少貸董學浙江多所
造就至今稱為得體所著有篠菴集五卷弟穆與和
同年進士有吏材仕終浙江叅政

劉珏字廷美長洲人宣德中郡守況鍾簡名家子為
掾珏在選中珏言有志於學不願為吏鍾嘉其志遣
補縣學生遂領應天鄉薦授刑部主事遷山西按察

僉事提督屯田年甫五十懇乞致仕珏性孝友恭謹
未嘗失色于人然操履清白人不得以私干之至于
好學之心老而不倦尤工唐律對偶清麗當時稱為
劉八句行草師李邕畫師王叔明皆能得古人筆意
所著詩曰完菴集

顧昌字德輝長洲人正統間領鄉薦授襄城教諭陞
淮王府長史轉廣西思恩府同知為人清介絕俗平
生未嘗受人一蔬之餽晚歲致仕家居詣人家誓不

飲食留之輒起去雖遠去數里寧饑渴而歸其文章簡潔似其為人

徐瑄字子敬嘉定人正統三年解元第進士授監察御史巡京畿及山海等關出按四川廣東所至有聲擢右僉都御史巡撫延綏等處嚴斥堠繕甲兵督屯種以廣邊儲葺學校以作士氣敵嘗入寇瑄督兵戰于孛羅池溝又戰于半坡墩金雞峪雙海子皆捷朝廷賜璽書重幣獎勞之未幾得疾致仕歸卒于家

祝顥字惟清長洲人正統間以進士授刑科給事中
建白多持大體被旨檢察在京寺觀無額者有青龍
寺在檢中僧稱密旨所建卒奏毀之景泰間陞山西
左叅議未幾遷右叅政時北敵擾邊公私困竭顥規
畫久之倉廩皆滿汾州有妖人作亂稱王年號天福
顥馳赴擒十六人而妄扳及千人顥欲為簡釋三司
難之顥執不可三司乃請處以強盜聞顥曰盜何事
改年僂平民不可罔上規免亦不可卒以實聞嘗按

行陽曲臨汾視學其聖賢像乃金人時所塑歲久傾仆顓患為更新洪洞縣有臯陶祠墓不飭坊里傳舍皆以臯陶名名之顓為葺治更署曰虞士師祠墓成化初罷歸顓吏材精敏詩文典贍言論動引經傳聞者聳然卒年七十九所著有侗軒集

練綱長洲人祖則成初名塤字聲伯洪武中以文學膺聘授左春坊司直郎克東宮經筵講官嘗劾大臣不法事上嘉之特賜錦衣一襲改河南道監察御史

則成幼以氣節自負與衆少合及居言路務盡其職
僚輩忌之出為雲南廣西推官為其下所中毒卒年
止三十有七人皆惜之綱字從道宣德乙卯以春秋中
鄉試第二名卒業太學正統己巳綱上中興八策遂
擢監察御史嘗按淮揚鹽法糾察不避權貴駙馬都
尉石璟亦在糾中又劾吏部尚書何文淵侍郎項文
曜典選不公文淵等罷去後按福建與按察使楊
珏相持皆左遷綱落判鄭州再改甘州前衛經歷綱

侃直有祖風然攻訐大甚故時有練綱口之號云
趙忠字行恕長洲人宣德五年以進士授監察御史
出按四川時松礮寨商巴刺麻判忠親詣之開示禍
福且劾邊將激擾之罪罷之叛者遂服再按浙江適
倭人入寇海上忠命慎修兵防黜其玩寇者倭不為
患陞陝西叅議忠風度凝遠文亦瞻麗忠同年進士
柳華同為御史終按察副使名亞於忠

文洪字公大先出湖廣武甯父始占籍長洲洪乃棄

武就學苦志刻力無間晝夜治易邃甚時從游者往往得高第洪屢舉屢北後子林領鄉薦與洪偕會試林遂中進士洪在副榜授涑水教諭人皆羨林之捷而憫洪之遲也三載致仕歸卒洪嘗求葬地術者指一舊冢曰得此必世貴其家亦願遷以售之洪斥不用人尤多之林出知溫之永嘉後改博平二縣稱治尤善發奸摘伏人服其明陞南京太僕寺丞前後建言時政十四事當道奏為例既而告病歸數年溫人

思之不忘用薦守溫未幾卒于官林學該博雖堪輿卜筮皆能通其說尤精於易數平生以經濟自負惜不究所施

盛景字允高吳江人景泰間由進士授監察御史清山東馬政值其地災傷上疏乞蠲民所負孳息癸酉出按廣東時瀧水賊猖獗景單騎諭之遂降又劾巡撫侍郎揭稽不法事未幾以言事過訐左遷古田典史天順改元轉羅江知縣值旱禱而得雨景曰此非

久計乃教民鑿池一千二百五十餘所旱不為害民
為立生祠於羅真觀尋陞叙州知府適戎人珙筠高
土獠叛朝廷遣將征討晁在行間多所斬獲上其功
未及報以贖致仕後追理前勞特遣使齎金幣寶鈔
賜于家又有戈立字允中者長洲人以太學生授南
京監察御史亦負才操有聲院中終廣東僉事

孔鏞字韶文長洲人其先裔出闕里父友諒永樂間
以易魁春闈選庶吉士出知四川雙流縣雙流之民

初未知學友諒拔其秀者親為講解士習稍變科第
多得人時鄰縣有劇寇越過雙流友諒行境上掩捕
之宣德間赴考吏部上命內閣集天下縣令當考者
七十六人試以歌贊賦策諸題拔用七人而友諒居
首分置六科未及選而卒鏞景泰甲戌進士知江西
都昌縣尋改廣東連山縣縣久被寇四境榛棘公署
亦無鏞招集慰勞始立縣治教民耕織守戰道路漸
通陞高州知府時高亦新被寇鏞身犯鋒鏑斬賊首

五百級奪還男婦四百五十口降其餘黨九千七百
人後黠寇鄧公長合衆萬餘屯茅洞洞去府城才十
里城中羸弱不滿千人鏞度不能支乃乘一馬往招
之賊視鏞來陳干刃夾道相向鏞徐行抵其營神色
不動下馬中坐與極論禍福一營皆聳獨公長尚未
順鏞乃遍歷營中諭衆降意而歸時已四鼓城中謂
鏞已死及歸大驚比旦賊降者萬餘人公長知衆散
亦降其餘寇在雷州化州遊魚寨博白者皆破降之

鎮臣上其功陞廣東按察副使領勅專守高雷諸郡
徭人不敢入境以母憂歸父老立生祠于化州後陞
廣西按察使歷左布政使未幾陞副都御史巡撫貴
州貴州苗尤悍猾有名阿溪者善謀阿刺者善戰二
人煽苗為亂議欲大舉兵鏞得其情先制其為黨者
率壯士掩二人擒之亂遂息後召為工部侍郎行至
富陽卒鏞平生忠信自許不顧利害論者謂其無愧
古人長厚之德鄉里稱之

程宗字原伊常熟人景泰中由進士授刑部主事遷
員外郎出知江西吉安府吉安最號劇郡宗能治之
奸黨屏迹政聲赫然父喪歸改知湖廣武昌府復有
治績擢四川左叅政再擢陝西右布政尋轉左入為
都察院右副都御史佐院事時兵部以陝西地重務
得人以經理邊事乃推宗往鎮遭母喪再起巡視雲
南召為刑部右侍郎尋陞工部尚書致仕

徐恪字公肅常熟人景泰丙子鄉薦成化丙戌進士

時葉文莊公盛為吏部侍郎薦恪授工科給事中恪所言皆切時事而尤務存大體陞湖廣布政司左叅議兵荒之餘民物彫瘵恪加意撫卹政尚寬簡人皆安之九年秩滿陞河南右叅政三年陞左布政使徽王府承奉司自置吏恪以非制革之王怒奏恪侮慢罪上特直恪以書諭王謂恪奉遵祖訓耳何罪之有河徙逼汴城有廷臣建議遷諸王府三司於許者公疏有五不可得寢陞都察院右副都御史巡撫河南

戶部遣官督征積逋恪上言民困乏請免徵有御史
言漢中鄖陽及四川夔府因各去本省遠甚故為盜
淵藪當別立一省專蒞之事下三處巡撫議未決恪
持不可乃止恪在河南久權倖多不便謀去之上不
忍調巡撫湖廣臨行民擁留號哭聲聞數里汴城為
之罷市布政司有羨餘銀三千兩贐恪恪正色却之
且自咎曰吾乃不為人見信如此至湖廣百姓曰即
故叅議公也必生我矣恪亦力任之適親藩之國宦

豎怙勢載鹽百餘艘抑市于民恪立捕其首置于法
斥其鹽出境外凡小人不得行其私者復百計譖毀
上欲保全之特命遷南京工部侍郎不由外廷論薦
人皆驚愕恪即上言傳奉非美名顧臣何人敢干清
議自惟立身稍異於衆不敢有所攀援以進辭氣峭
直求退甚力上勉留之乃始就職恪於工役物料計
處詳密吏胥無所售其奸班匠至部者舊多分給勢
家公靳不與人尤怨之以年近七十乞致仕章再上

不允乃以六載考績進階正議大夫資治尹入謝疾
作于廷中命給驛以歸自恪之歸言者屢言恪可屬
大事欲起用之不果臨終語其子曰吾受國厚恩無
所裨益勿乞身後恩以重吾過前輩蕭山魏尚書可
法也朝廷聞之賜葬祭如制恪儀觀偉然器宇凝重
望而知為元夫鉅人所為詩文平實典雅殊有古法
尤善章疏紆徐曲折能達其所欲言巡撫兩省凡遇
裁異或事關軍民即條陳時弊動輒數千言無不曲

盡時宜性剛正詳慎苟利於國與民必行其志

章格字韶鳳章珪之次子也由進士授南京工部主事陞南京刑部郎中用刑不苛獄囚懷之陞廣東按察副使巡視海道時琉球使臣蔡璇等率數十人以方物買鄰國風漂至廣之香山港守臣當以海寇欲戮之為功格為之辨奏還其資而遣之再陞雲南按察使會緬甸諸夷叛服不常格善於撫綏莫不畏服陞福建左布政使入為南京光祿寺卿未幾陞南京

大理寺卿自陳致仕詔許馳驛歸格敷歷中外幾五十年所在以清謹聞為人尤號長者

李應禎名姓以字行晚更字貞伯長洲人世醫家隸南京太醫院籍應禎生于京邸自少警敏景泰癸酉領鄉舉入太學時有中貴欲致為塾師者詣齋舍以請應禎固拒之選授中書舍人直文華殿同官多由他途以進恥與為伍乞改教官補外不許慶成宴中書舍人坐給事中御史下應禎奏非舊制嘗以例寫

佛經應禎上言臣聞為天下國家有九經不聞所謂
佛經也臣實不能寫言甚訐直人皆危之上不之罪
秩滿陞南京兵部武選司員外郎歷職方司郎中南
京尚寶司卿再陞南京太僕寺少卿應禎好古博學
篆楷俱入品格文詞簡健喜面折人多畏之卒
之日無以為斂友人文林史鑑輩為營地以葬焉鑑
字明古吳江人博學尚氣有文才林自有傳

吳寬字原博長洲人自少篤學勵行為諸生已隱然

有重名數試不利卒業太學再舉始得解成化壬辰
狀元及第授翰林院修撰累陞詹事府少詹事兼翰
林院侍講學士出為吏部侍郎尋復學士入內閣進
掌詹事府事陞禮部尚書卒贈太子太保諡文定寬
為人靜重醇實自少至老人不見其過舉不為慷慨
激烈之行而能以正自持遇有不可卒未嘗碌碌苟
隨言詞雅淳文翰清妙無愧古人成化弘治之間以
文章德行負天下之望者三十年然位雖通顯而迄

不得柄用天下惜之所著有文集若干卷

陸鈇字鼎儀崑山人天順癸未會試第一廷試第二授翰林編修預修英廟實錄書成遷修撰孝宗皇帝在東宮鈇侍講讀進退閒雅敷奏明密最為得體及即位進太常少卿兼翰林侍讀充經筵日講官將進講忽得末疾給驛歸卒于家訃聞詔賜葬祭官其子中書舍人鈇沈靜好學解悟過人而矜嚴自持入少當其意者其為詩文必欲作不經人道語有春堂稿

春秋鈔畧藏於家

張泰字亨甫太倉人生而秀穎登進士第為翰林庶
吉士授檢討陞修撰泰為人坦率絕去厓岸恬淡自
守獨喜吟詩其詩豪邁雋爽善於常格中出奇雖不
學書而書法亦翩翩可喜所著有滄洲集若干卷行
於時

陸容字文量太倉州人其先冒徐氏後復姓成化間
由進士授南京吏部驗封主事後改兵部職方司尋

陞郎中賈胡進獅子且至奏乞大臣往迎容議遠人
貢異物當卻之顧迎之邪貽譏後世事遂已嘗籍官
馬于北方諸府還陳馬政四事甚悉弘治初都指揮
王欽梁宏夤緣中貴陞都督容奏良等招權市恩宜
正法以禁後來疏兩上卒奪其命由是當道頗不悅
出為浙江右叅政容至官復條奏兩浙不便者八事
多用之後以浮議罷歸容政事之暇手不釋卷所著
有式齋稿乙戌稿封事錄兵署錄問官錄菽園雜記

太倉志水利集共若干卷


王庭字元直崑山人少學於葉文莊文莊甚器之領鄉薦授鄆州學正遷國子學錄後以績再遷潘王府右長史卒庭孝友廉慎在鄆時僦民田耕以自給諸生束脩無所取律身教人動以古道王府尤得輔導之正嘗考試江西御史欲試諸考官庭獨不就試御史卒用以主試曰是不苟人也庭平生自負剛直百撓不回其學貴踐履不事辭章嘗曰徐穉管寧不

聞能詩而世仰其名時以為名言

姜昂字恒頌太倉人自幼穎敏父嘗欲其服賈事昂
自奮志于學成化中領鄉薦登進士第出知棗強縣
有異政召為御史率同官悉力劾倖臣李孜省聲稱
籍然出知河南府以母老懷土屢疏懇乞便郡就養
改知寧波在任六年復以母老棄官歸家就拜福建
左叅政不起上疏乞終養母卒服除部使者交章奏
薦俄以疾卒士論惜之昂為人仁孝廉靜恬退作縣

作郡罔不得體平生一介不苟取予居官三十年家業蕭然其平居恂恂若無能者

朱栻字良用崑山人成化辛丑進士授蕭山知縣廉慎有為擢南京監察御史遇事敢言所上疏多切直不諱時論偉之秩滿便道省母卒於家



姑蘇志卷五十二